




NOVEMBER 2023

VOLUME 63 | NO. 11

# Khristian Thukizakna



**THILPIAK a Pathian Limsak**

**EDITORIAL BOARD**

**Editor**

Rev. Dr. S. Vung Minthang

**Managing Editor**

Rev. Thawndoulia

**Contributing Editors**

Rev. K. Kamchinkhup  
Rev. Nenglian Vualnam

**Production Managers**

Rev. V. Thangkhanmuan  
Upa T. Paukhansiam  
Mr. Mangthianlal Samte

**Circulation Manager**

Upa K. Jamchinthang

**Design & Setting**

Upa Khuplajem Guite

**CONTENTS**

1. EDITORIAL	: 01
2. THILPIAK A PATHIAN LIMSAKNA:	03
3. CHIRSTIAN ETHICS	: 05
4. BIBLE STUDY	: 11
5. GAMMIAL AW	: 16
6. DORCAS CORNER	: 22
7. YOUTH CORNER	: 25
8. CHILDREN'S CORNER	: 28
9. REPORT	: 29
10. THU TUAMTUAM	: 32
11. EBC INNSUNG THU	: 33
12. ORDAIN SUNNA	: 38
13. KIPATHU GENNA/ THUMNA MAKAI	: 39

Lakman:- Kum khat ₹ 150.00;  
Dak ah ₹ 200.00; Bu khat ₹ 15.00;  
Gamdang US\$ 20.00

**Thusuah ding piakna:**

Editor,  
Khristian Thukizakna  
Dorcass Hall, P. O. Box - 6,  
New Lamka,  
Manipur - 795006, India.

*Thusuah sung-a kigente  
Evangelical Baptist Convention  
Saptuam ngaihdan ahi kim kholkei.  
Thusuahte in amau thusuah ah moh a  
pawtek ding uh.*

## THILPIAK A PATHIAN LIMSAKNA

*Pathian in khovel a-it mahmah zia in, a Tapa tang neihsun apia hi. Kuapeuh amah gingtate amanthat louh ua, tangtawn hinna aneih zawkna ding un (Johan 3:16).*

November kha chidam a hon musak in Toupa min i simtute chibai ni aw. Hun in awlawl in hon tonpih a November honpi galkai a, i kipak hi. Hun hong paizel a nidang bang ngei nawnlou ding khovel ah om mah lehang Kilamdang ngeilou Pathian i neihkhak mahmah hamphathuai in lungmuan huai hi. Tukha a i thupi 'Thilpiak a Pathian Limsakna' chih toh kisai Toupa thu in hon sinsak khenkhat enkhawm leng i chi hi.

**Thilpiak Pathian patmasak ahi:** I Bible tang tel ah Pathian in a Tapa tang neihsun ahon pia chih i mu hi. Tua kia hilou in Pathian in thil tengteng a hon piak ahizomah mah lai hi. Na pumpi, na hinna, na zi, nata, na inn na lou, na neih na lam, na huih siang dik, vuahtui, kholum-khovot, bangkim Pathian a kipan ahi (1 Kor 3:21-23). Hiai theichian mahmah C.T. Studd in "Jesu Khrist Pathian hi a kei ading a hong si ahih intuh, Amah ading a ka piak theih khempeuh sang lua chih a om theikei ding achi hi." Pathian pethuk zou ngei ngei lou ding i hi. Himahleh, i piak zoh sunsunte hon kipahpih lai pen i hamphatna ahi zaw hi.

**Pathian in mihingte neihlehlam deihgoh ahi kei** (Sam 50:11-13). Pathian eite tellouin a khosa thei mahmah a, eite Amah tellou in i khosa thei kei uhi. Pathian eite bang a thilsiamte a kivak leh kinga leng ahikei, "Gil kial mahleng k'on hilh kei ding: leitung leh a sung a thil om teng teng kei a ahi" a chi hi. Mihingte a hon etkolna a tam seng lua kisa a hon huh un chi a thachial leng ahikei hi. Himahleh Laisiangthou gen bang in Pathian hon hihsakte thei a kipahna ziaka peding in hon deih hi "Pathian in kipaktaka pemite a it hi" chih ahi (2 Kor 9:7).

**Thilpiak a petu ading in vualzawlina ahi** (Luke 6:38). Pathian' hon hihsakte a thupi luat zia kin mihingte'n thilpiak in Pathian kikhup zou ngeilou ding hi. A hon piaksate' ban ah mimal tung a

vualzawlna a behlap theihna ding in “Pia un, huchiin piakin na om ding uh” chi hi (Lk 6:38). Pathian kiang a thilpiak ipiakte a petu’ a ding a supna leh taksapna ahih sang in a tamzawsem ngahna hi zaw hi. Adiktakin “Noumau tehna ngei maha tehsak a piak in na om ding uh” achih in na piakkhiak zilin na mukik ding a chihna ahi. Na piakkhiak pen a luanglut nawn pen ading a kong honna ahi. Etsakna ding in, tumlam gam saptuamte’n apaisa kum 400 sung vel leitung pumpi ah Tanchinhoih nasepna ding in aneih leh lamte uh ban ah tampite’n ahinna uh nasan pekhia in nna ana sem uhi. Kum 300-400 sung a a sen tengteng uh duaisan lou ding hi. Tua asennate uh ziakin tumlam gamte zawng gawpta uh chih ki theilou hi. Mihing angka (arithmetic) ah piakkhiak peuhmah supna ahi, himahleh Pathian pilna ah bel i piakkhiakte punna ahi zosop hi.

Tu a saulou a i muh bang in thilpiak kichi khovel mite thil kipiaktuah bang lel ahikei hi. Khristian thilpiak in khalam suangphum thukpi anei hi. Johan in tua theiin “Aman a hon it masak ziakin i it uhi” achih bang in khristian nasepna tengteng Pathian nasepsa tung a thupina piakna leh biak piakna ahi (1Jn 4:19). Robert Louis Stevenson in “Itna tellou in thilpiak na pethei hi, himahleh na it taktak leh thilpiak na pelou theikei ding” a chih adik mahmah hi. Ahihleh, thilpiak kua kiang a bangchi piak ding ihi hiam chih Laisiangthou in hichiin agen hi. **Khatna**, Biakin a tawikhawm a piak ding ahi (1 Kor 16:2; Malaki 3:10). **Nihna**, biakin polama ah mimal tasamte kianga itna thilpiak (Mat 6:2; 25:40). Saptuam pawlpi nasepna leh mimal a Pathian nasepna chiin a kikhen thei hi. Huaiziakin, saptuam in nasepna ding a thilpiak bil-atsa bangzah hiam i nei uhi. Tuaban ah Inkuan leh mimal hun lemtang a thilhoih sepna ding omte ahi. Tuhun i gam dinmun et in zing hiam nitak hiama sangkil a tasam hong dak om kha ding hi. Tuabang te ah na Pathian limsakna na daw k sak thei hia? Saptuam in relief project aneihte ah na Pathian mitna a daw k kha hia? I mi i sa gal thuak a gentheite apan gamla taka om a mahni bitna ding mun a galmuang taka lum-le-va h taka om sawm maimah i hi hia? Tuhun a i buaina pen buai petmahna ahi ta a, Pathian limsakna latsak hun ahi “Unaute aw, thu kia in it keini, lei kia in leng it sam kei ni, thilhih leh chih taktak in hi zaw hen” (1 Jn 3:18). ■

# THILPIAKA PATHIAN LIMSAKNA

- Rev S. Thang Johnson, *DS Mizoram*

*Michih in it pipi a pe lou in, piak louh theihlauh bang a leng ngaihtuah a pe tuanlou in, a lungtang ua atup bang zel un pe chiat uhen: Pathian in kipaktak a pemi ahi a it. 2Korinth-te 9:7*

**K**TZ simtute tengteng, thilpiak thupi penpen hidia hong kippia i Toupa Jesu Khrist min siangthou suang in deihsakna chibai kon buk hi. Pathian Limsakna i thupi uh khenzakna nuai ah *Thilpiak a Pathian limsakna* chih thupi pansan in saulou kikum leng i chi ahi.

**PULAKNA:** I biak pa Pathian tuh thilpiak thupi penpen atapa tang neihsun Jesu Khrist ei mikhialte tantu/ Hondampa dia hon petu/ sawltu ahi. Tua tapa Jesu'n mikhialte tengteng sih sik a Kalvari Kros a si in ngaihdam a i om theihna di'n ahinna (a sisan) hon pia hi. Tua thu Tanchinhoih i zak pen ginna a i san/i pom theihna di'n Khasiangthou nasep khelk kiphawkna, kisikna leh Lal leh Hondampa dia tua Jesu santheihna, kitheihchetna leh khamuanna hon pia hi. Huaiziakin, Thilpiak a Pathian limsakna thu gendia i kisak laiin, Jesu a om Pathian itna, hehpihna leh ngaihdamna ginna a sangte tengteng kiang ah **HOTDAMNA** athawn in

ahon pia ahi. Tua Jesu sang/ pom a neitute Pathian tate i hong hita ua, thil/van/sum te kia piak a Pathian bia ding hilou a i pumpi, i kha, i hinna tengteng a kithoihna hing leh siangthou leh Pathian lungtuak, a pomtak dia haltum thillat bang a kipiakkhiatna hinkhua ahi. Thilpiak tungtawn a Pathian limsakna taklat i sawm lailai in eiten i lungtang, kha leh hinna tengteng in i kippia khia hiam chih tuh Pathian etdan hi a theih in a om zaw ahi.

**A. PATHIAN NEIHS A ENKOLTUTE I HI:** Gingtute tuh Pathian tate i hi ua, i pa neihsa kem a enkol tute ihi uh ahi. Michih in thilpiak na muh bang zeel un, Pathian hehpihna chiteng kemhoihte

bang in, huaite in nna kisepsak tuah chiat un chiin 1Pet 4:10 ah hilhna i mu ahi. Hiai ah kemhoihte chih in *as good stewards* chih genna ahi. Hiai ah kempa tuh mi muanhuai ahih akiphamawh ahi (1Kor 4:2). Pathian neihsa ahon vualzawlina kemtu gingtute i hihziak un kiphaltak leh kipaktak a thilpiak i piak zel ding uh ana hi ahi. (1Chro 29:14; Jak 1:17).

**B. SAWM-A KHAT NGET A OM I HI:** Pathian in ahon piaksa a vualzawlinate apan sawm-a khat amah ipiak kik ding ahon ngen ahi. Lev 27:30 ah, gamsung a sawm-a khat peuhmah... haichi hitaleh, sing gah hitaleh TOUPA-a ahi, thil siangthou ahi achi ahi. Tua thu mah sunzom in Diuteronomi 14:42 ah na lou ua an tung tengteng sawm-a khat na piak ngeingei ding uh ahi, ana chi hi. Thukhun thak ah leng Jesu'n sawm-a khat piak ana khamlou ahi (Lk 11:42 cf Matt.23:23). Sawm-a khat piakna tuh i diktatna tehna hipah kei mahleh Pathian thumanna leh amah i limsakna taklatna leng ana hi ahi. Sawm-a khat peloute

TOUPA lok/suam ahi uhi (Malaki 3:8).

### C. THILPIAK IN A TAKLAT TE:

1. **Diktatna taklatna ahi.** 2Kor 9:9 ah 'a hawmzak a gentheite kiang ah a pia a, a diktatna khantawn in a omgige chih gelh bang in' chih i mu hi. (Sam 112:9).
2. **Kipahna taklatna ahi:** 2Kor 9:12 ah 'hiai thilpiak in misiangthoute taksap awng ahuksak kia hilou in Pathian kiang a kipahthu genna tampi hiin aluanglet nalai hi' a chi ahi.
3. **Thuginzuihdantaklatna:** 2Kor 9:13a ah 'hiai thilpiak tungtawn a etkhiat aom in Kris Tanchinhoih lam a na thugin uh na zuihdan uh.. taklang ahi' ana chi nawn hi.
4. **Pathian hihthupina taklatna ahi.** 2Kor 9:13b – 'thilpiak a thilphal dan un Pathian hih thupi ding uh ahi' ana chi ahi.

**D. KIPAKTAK A PE MI PATHIAN IN A IT:** (2Kor 9:7) Pathian in i thillatte sanga a kipahpih theihna din apetu pen ama pom/san mi hih

kulmasa hi. Amah a tasam Pathian hilou a, lungtang enchianpa hi zaw ahi. A hon vualjawl ding deih leh lametna bang leng i piakna ziak hi thei. It kawm pipi a leng piak khak theih banah makai heutu hihziak leh hihutna ziak a leng piak khak theih tham ahi. Huchih laiin lungtang a kipaktak a thilpiak in Pathian i itna, ginna leh pichinna genkha ahi. Midangte tung a Pathian itna genkhetu tuh i thilpiak ah ahi.

**THUKHUPNA:** Agenthei haksa diak ten thilpiak i hah

piak dedeuh ding ana hizaw ahi; Macedonia gingtute a gentheihna uh athilphalna bulpi ahong suah bang in (2Kor 8:2). Bangkim a etton ding Jesu Khrist neite i hi uhi. Amah tuh i hong hauh theihna dia ahong gentheihdan theigige ni (2Kor 8:9). Pathian etdan a ama neihsa guksak/suhsaktu hilou a, athuchiam van tawhlette hong a vualzawlna ahong buahkhiat theihna ding in athuchiam enchian tute hithei di'n Toupa'n simtute tengteng hon vualzawl chiat hen. ■

---

## CHRISTIAN ETHICS

*Hebrewte 5:12-14 (BIIS) "Ataktak in, noute sinsakmi na hih uh hunta ahi. Hinapi-in, Pathian thu toh kisai thutak thubulte hon sinsak thak vek ding mi na kul lailai uhi. An gum hilou in, nawitui na kisan lai uhi. Nawitui sen mi zaw naungek ahi lai a, diktatna tawh kisai sinsaknate a thei nai kei hi. An gum ahih leh bel, pichingte a ding ahi. Pichingte bel, a theihtheihna uh kisin zongsang in, a sia a pha khentel thei ding in a kisinsiamta uhi."*

**THUPATNA:** Atung a Bible tang kitaklang i et leh i Khristian na uh toh kisai kingaihtuahna ding tampi ahon musak hi. Pathian hehpihna ziak in kum 113 bang Tanchinhoih ina kemta ua, Nam hampfa i hi i kichi ua, hampfa i himah uhi. Himahleh Khristian hinkhua a i hindan lam i ki-et chiang in Khristian khangthu a om himah lehang anngum i nethei nai kei uh i bang ua, et thak ding tampi om in muh theih hi. *(An gum hilou in, nawitui na kisan lai uhi!... Nawitui sen mi zaw naungek ahi lai*

*a, diktatna tawh kisai sinsaknate a thei nai kei hi*). Huaiziak in, pichinna kichi a hun sawt thu leh kum upat thu ahikei chih achiang mahmah hi. Khovel khantouhna hat mahmah lak ah dik leh diklou khensiam ahaksat hun a tam hiaihai a, mun tamtak ah lamdiklou i zuikha nak uhi. Huaiziak in i gam ah “Gamtat Khohei Dingdan” abiktak in “Khristian Gamtat Khohei Dingdan” kichih nakpitak a i sinthak uh akul hi.

### **I. KHRISTIAN GAMTAT KHOHEI BANG AHIA?:**

Heutu masate'n *ethics* kichi *gamgi, gamtat dingdan thu suina ahihkeileh asia leh apha khentelna* chiin ana hihchian uhi. Khristian ethics i chih Chiang in Laisiangthou pansan a paidan leh chindan hoih leh hoihlou suina genna ahi. Khristianna toh kisai omdan leh gamtatdan a lakkhiakna leh Thugin toh kisai chindan a lahna ahi akichi hi.

Khristian gamtat khohei i chih pen dan leh thupiak zuihna lel hilou in Pathian Thutak pansan a hindan dik zuihna ahi. Huaiban ah, paidan khat omsa zuihna lel hilou in mihinna nei; Jesu Khrist a kinga ahi. Ethics leh Morals in kibatlouhna zek a neih tuh ethics in hihding leh hihlouw ding lam toh kisai agen a moral in bel thilhih leh nungchang lam a kawkdeuh hi. Ethics toh kisai chithum in

a kentheih hi: *Metaethics* (A sia leh a pha bang pansan a khen ding). *Normative ethics* (“Pansan” pen zang a sia leh a pha khenna) leh *Applied ethics* (A sia leh a pha kikhen khiate a tak a zatkhiatna).

### **II. BANG ZIAK A GAMTAT KHOHEI SIN POIMOH AHIA?:**

Khovel khantouhna hattak in tuailaite hinkhua ah lampika tampi omsak hi. Banah tulai khovel khantouhna leh a zuitu (*Post-Modernism*) lungput (*thutawp: kuaman thutak atheithei tuankei*) in tua lampika munte ah lamdiklou zui ding a thuzoh in siatna thupitak atun nak hi. Huchibang dinmun ah Khristian Tuailaite'n i gamtat khohei uh i velthak apoimohna ahong lian mahmah hi. Khristian gamtat khohei sin a poimohna ziak khenkhat a nuai abang in ka hon taklang hi.



- Miteng in niteng a hoih leh hoihlou banah dik leh diklou kal a thupukna i lak gige ding om ahihman in.
- Thupukna peuhmah bang hiam a tehna khat zang a kibawl ahihman in.
- Jesu' sinsakna dik leh Pathian thu toh kituak ahihman in.

**Huailai in Israel gam ah kumpipa a om kei ua:** michih in amau hoih saklam lam in ahihmai uh. - *Vaihawmmite 17:6*. Mihing adia lampi dika kilawm a oma, himahleh huai tawpna sihna lampite ahi. - *Paunakte 14:12*.

### III. KHOVEL IN DIK LEH DIKLOU A KHENDAN

1. *Dik i chih 'thahatna' ahi.*  
**Genchetna:** Thrasymachus (c.459-400 BC), Greek philosopher in, "dik a vaihawmna (justice) kichi a hatzaw pawl te chih dan ahi" a chi hi. Dik kichih kua a hatzaw, kua'n thu a neizaw chih ahi.  
*Adiklouhna:* Hiai ngaihndan in "Dik" chih leh "thuneihna" a chituamna omsak lou (Ets. David). Ahitak in, dik hetlou a thunei leng omthei a, dik himahleh thunei zoulou leng omthei ahi.

2. *Chindan hoih i chih atamzaw dik ahi.*  
**Genchetna:** Koi society hiam in hoih chia ana pompoh uh omdan kilawmte ahi. Society chih in amau tatdan dik (gamtat-khohei) kineih chiat in a hoih tawntung chih omlou.  
*Adiklouhna:* Society khat in a zuihlel pen adik zuih ngeingei ding chihna hitheilou hi. Society teng in hoih asak kibanglou kia hilou in kikalh kha bang om hi. Hiai bangte ah anih a dik tuak chih hitheilou hi. Khovel thil paidan akikheng dungzui in a hoihsak bangleng kikheng zeel hi. Atamzaw leng diklou theitham hi (Ninevi, Noah hunlai, Sodom leh Gomorah).

3. *Mihing ahi atehna dik.*  
**Genchetna:** Protagoras (c. 490-420 BC), Greek philosopher in, "Ami ahi thil teng tehna" (*Man is the measure of all things*) ana chi hi. Aman "Kei a dia deihhuai/nuam ahih nak leh dik himai ahi" chih ngaihndan khauhtak anei hi. Dik leh diklou tehna pen mimalte deihtelna a kinga ahi. "Ahai omkei, ngaihndan kibanglou maimai hi" *Adiklouhna:* Mi dang te'n i ngaihndan hoihsa kei

mahleh en hoih i sak nakleh hoih chih ahih man in mimal ngaihdan tehna hisak hi. Bible toh kikalh kha hi (2 Kor 10:12). Mihingte leh i lungtang mahmah hoihlou ahi (Jer 17:9; Pau 16:25). Anuam teng leng adik hilou a, “adeihhuai” chia kuahiam in a chih teng leng a deihhuai taktak hilou thei ahi.

4. *A tamzaw leh a tangpi ngaihdan ahi adik. Genchetna:* Mimal hilou in mihing (tamzaw) te ahi tehna a neih ding chih ngaihdan genna ahi. *Abuaihuaina:* Mihingte ngaihdan kibang kim veklou ahih ban ah mihingte lak a tamzo tham ngaihdan leng diklou chih omthei lai hi. (Ets. Kanan gam enkhete dinmun, Daniel leh alawmte).

5. *Dik i chih ahunlel theihna ahi. Genchetna:* Aristotle (c. 384-322 BC), Greek Philosopher khat in, “gamtat hoih kichi ahun chianglel ah kimuthei ahi” (Morality is found in moderation) achi hi. Dik kichi i thihhihte ahunchianglel theihiamna chih ahi. Aman lauhna leh hiamgamna kikal a om ahun lel chu hangsanna ahi. *Adiklouhna:* Bible in “moderation” (“migitna” Phi

4:5) gen mah leh hiai pen a genkhiat dan khat hi a, himahleh dik leh diklou tehna bel hikim theilou hi. Hun khenkhat ah a leklua i chih te leng a hoih na hithei zel hi. Huai lou in, ahunlel i chih khovel pumpi a kibang veklou hi. Ahunlel i chih i nasepna hon makaih ding in ahoih a, himahleh adik leh adiklou khenkak nang bel ahi kei.

6. *Anuam theithe i om leh dik himai. Genchetna:* Epicurus (c. 341-270 BC), Greek Philosopher leh a nungzuite’ (Epicureans) gindan in dik i chih “nopna hon pete ahi a, natna hon pete a diklou” chih ahi. *Adiklouhna:* Nuam vek, haksa vek chih omthei mang lou ahi. A nuam teng leng hoihkim hilou a, ana ahaksa teng leng asia/ahoihlou hikim lou hi. A nuam leh haksa tehna ding leng buaihuai pi ahi. 2 Timothy 3:12 (Sawina nuamlou); Matthai 10:34 (Temsau lengsak ding); Mt 10:38 (Cross not comfort zone); Luke 7:19 (Baptis pa Johan).

7. *Adeiuhuai ahih nakleh dik ahi. Genchetna:* Gamtat hoih kichi bang hiam tangtun sawmna a poimoh lel hilou

in huai mah a deih huai leh lunggulh ahi. "The end justifies the means" *Adiklouhna*: Hiai in gamtat hoih bang hi hiam chih genchiang kha lou a, "i deih" chih leh "a tak a deihhuai" chihte khenkak haksa hi. Hoih a kilang teng leng a tak a hoih vek hizel lou ahi (Pau. 14:12).

#### IV. LAISIANGTHOU IN DIK LEH DIKLOU A KHENDAN (CHRISTIAN ETHICS)

Mihing ngeina leh leitung thubulte bang a mihing' thilsui dan leh, kikhemna maimai a, mi'n hon matzawh louhna ding un pilvang un. Tuate khempeuh Khrist a kibulphuh ahi kei hi (*Kolosate 2:8*). *Laisiangthou khempeuh Pathian' hatkhiak ahi. Tua ahih man in, sinsakna ding, taihilhna ding, bawlhohina ding leh diktatna lam a kichilna ding in a phatuam hi. Tua bel, Pathian mi pen, Pathian in a bukimsak theihna leh, nahoih chiteng sem ding a athop theihna ahi. (2 Timothy 3:16-17).*

**1. *Dik i chih Pathian deihdan a kinga ahi. (1 John 2:15-17; Rom. 12:1-2)***

- Pathian in hoih achihte hoih, hoihlou achihte hoihlou
- Pathian deihdan Laisiangthou ah atheihtheih hi. (Khovel/Kei mimal/Pathian)

**2. *Dik i chih a kikheng ngeilou adik gige thutawpna ahi. (2 Tim. 3:16-17)***

- Akikheng ngeilou leh adik tawntung Pathian apan ahih ziak ahi.
- Tua hih dan ding hilel lou in, hihding dan him ahi hi.

**3. *Hih ding dan kawkmuhna (Exodus 20:1-17)***

- Dan thupiak sawm (moral law) kichiantak hon pia.
- Pathian toh i kal leh mihing toh i kal ading a bukim ahi.

**4. *Kikheng ngeilou thutawp***

- Khovel laibute tul hun leh outdated hun nei, revised nilouh ngai.
- Pathian thupiak leh a dante bel kikheng ngeilou, tulngeilou ahi.

**5. *Thuman ding i mohpuakna ahi (Joshua 1:6-8)***

- Dik i chih tehna mohpuakna toh kisai ahi.

- Deontological ahi a, teleological hilou ahi. “Huchih leng agah hoiho di hia?” chih a kinga ahikei hi.

### **EBC’ THU-UP SINSAK**

**GENKHIATNA:** Laisiangthou: Thukhun Lui laibu 39 leh Thukhun Thak laibu 27 kigawm Laisiangthou, thumal leh a vekpi-a Pathian’ hatkhiak thu, a kigelhna masa-a a diklou omlou, up ding leh zuih dinga thuneihna sang bel leh a tawp ahi, chiin ka um uhi.

### **V. PATHIAN’THUPINA DING A THUPUKNA BAWL DING DAN**

1. Jesu’n tua dan in a hih diam? (Phil. 1:27)
2. Pathian’ thupina ding ahithe diam? (1 Cor. 10:31)
3. Ka khalam a diing in a phatuam diam? (1 Cor. 10:23)
4. Ka sia-le-pha theihna a buaisak hia? (Rom 14:23; 1 Thes. 5:22]
5. Midang a kupalpai sak thei diam? (1 Cor. 8:8,9)
6. Ahoihlam in Pathian diktatna delhna ahi diam? (2 Tim 2:22)

7. Theihpihna nasep a sukha diam? (1 Cor. 10:32-33)

**THUKHUPNA:** I khovel uh theichian kawm a Khristian ethics zatdan i siam mahmah uh a poimoh hi. Tulel a khotang in i tuah lellel uh chouna (challenges) atam mahmah hi. Kibulphuhna kikhenglamdang i nawk hi; Inkuan Paidan ah kikhenglamdang thupitak a om hi; Khawlvanzat chituamtuam a kithopna a thupi thei mahmah hi; hamhaih leh genhakginglah mahmah a om tampi i om uhi; utnate kintak a pichin utna i nei lian mahmah uhi. Bangteng hileh, i tulel dinmun theikawm in Pathian hatna muang in Diktatna a kibulphuh thakna leh kilamthakna toh Khristian hindan diktak a i hin theihna ding in hanchiam thak chiat ni.

*“Hiai thulela tawpna ahi; a vekin zak in a omta: Pathian laudan siam inla, a thupiakte zuiin; hiai lah mihing hihding pumpi ahi ngal a. Pathian in lah thilhih chiteng vaihawmnaa la lut ding ahi ngal a, thil selguk chiteng, a hoih hia ahihkeileh a hoihlou toh” Ekljiasti 12:13-14.*



# BIBLE STUDY



Pastor Tualthianmung Hangzo, Area Pastor, EBCC Bukpi

**Text : Kolosate**

**Thupi: Gingtute omding dan (3:1-17).**

**T**humapi: Na piangthak ta hia? Hi. Na omdan toh tanchinhoih kituak hi'n na thei hialeh? Hiai dotna nihna pen Kolossa khua a saptuamte hamhaihna pen ahi. Paul in Khrist' hihna leh A' nasepte Chiangtak a a gen khit in, gingtute dinmun leh omding dan toh kisai bung **3na** ah hon gen sunzom hi. Huai tuh saptuamte'n vanlam thilte a thupipen in koih uh henla, a hun paisa khelhnate uh suahkhia in, Khrist' hehpihna ah kithuam le uh chih Paul in a sinsak ut ahi. Hiai sinsakna pimohtak suutkhawm ding a kisa i hihman in kithalawphuai ka sa a, simtute a di'a vualzawlina ahih ding ka thumna ahi.

**Bung 3:1-17 sung hilhchetna.**

**T. 1-4na.** *“Huchi in Khrist toh kaihthohkhawm a na om tak man un, tunglam a Pathian taklam a tu Khrist omna a thil omte zong un. Tunglam a thil omte ah na lungsim uh nga un; lei a thil omte a nga lou in...”*

Mihingte a di'a Pathian naihna omsun Khrist ahihdan genna in Paul in *“Pathian taklam a tu Khrist”* chi'n Pa Pathian leh tapa Khrist kizopna hon gen hi. **T.**

**1na** a thumal **“zong”** chih in hinkhua etkikthakna gen hi. Khrist toh kaihthohkhawm a omta i hihman ua, ei gingtute'n van mite omding dan toh kituak a, i hinkhua uh bawlthak di'a pan i laak ding uh ahihdan genna ahi.

Hiai thuvual **“na lungsim uh nga un”** chih in ngaihdan letkip tintenna toh kisai gen hi. Bang a letkip ding? *Khatna ah*, kha gilou leh a thuneihna, mihing' dan-le-

dunte, taksa bawlgentheihna tungtawn a bawltawm biakna chihthe ei gingtute'n Khrist' sihna tungtawn a sihsan khinta i hihna uh ahi. *Nihna ah*, Khrist' thohnawanna i koppihna uh tungtawn a Pathian kiang a Khrist toh i hinna uh seel a om ahihna toh kisai ahi. *Thumna ah*, Khrist hong painawn hun Chiang a gingtute tuh thupina a thop a-om a, Khrist toh phoulaak a om ding i hihna uh ahi. Hiai thudik a theihstate uh saptuamte'n lenkip tinten uh henla, leitung ah van mite bang in khosa le uh chih Paul in a deih ahi.

**T. 5-6na.** "*Huchi in noumau a lei lam thil deihna omte that un, kingaihna, nitna, hukna, utna gilou, huaihamna; huai milim biakna ahi. Huai thilte ziak in Pathian thangpaihna thumanglou tate tung ah atung nak ahi.*"

Thumal "**that**" in a kim sipsip a sukbeina toh kisai gen hi. Mihing lui in a lunggulh sa utnate a kim sipsip a hihsiat ding genna ahi. Huan, gingtute'n i ngaihtuahna uleh i pumpi ua kahiang tuamtuamte asianglou leh

khovel thilte sepsuahna di'a khaam bikbek ding chih genna leng ahi. *Kingaihna, nitna, hukna leh utna gilou* in numei-pasal kal khelhnate leh thil gilou hih utna gen a, *huaihamna* in tamsem deihbehna gen hi. Bangziak a Paul in "*huaihamna*" pen "*milim biakna*" chi ahi dia? Khrist leh vanlam thilte sang a leilam thilte deihna tuh a siamtu Pathian sang a thilsiamte deihzawkna ahiman ahi. Huai mite tung a "*Pathian thangpaihna*" tung zel ahihdan Paul in gen hi. Hiai a "*thangpaihna*" chih thumal tuh siatgawpna genna ahi. Pathian' deihdan toh kituaklou khelhnate Pathian in enliam theilou a, A' hehna leh A' lungkimlouhna pen siatgawpna tungtawn a langsak chihna ahi.

**T. 7-8na.** "*Nou leng tuma lam a huai thilte a na khosak lai un, huaite ah na kalsuan uhi. Himahleh tu in nou leng hiai tengteng, hehna, thangpaihna, huatna, gensiatna, na kam ua pau zahmohte koihmang un."*

Paul in **t. 5-6na** sung a khelhna a gente ah Kolossa khua a saptuamte kibualkha

thamtham mahle uh Khrist' sihna a koppihna uh tungtawn a khelhna lam toh kisai a amaute misi suakta uh ahildan gen hi. Huai tuh a sapumte uh khelhna vanzat di'a hithei nawnlou bikkbek chihna ahi. **T. 7na** a "tuma" leh **t. 8na** a "tu" chih thumal in hotdamna a tan ma ua a omdan uh toh tua a omdan un chituamna a neih ngeingei ding chih lampang kawak hi. Huaiziak a **t. 8na** a thumal "koihmang" in hih nawnlou bikkbek *ahihke'h* tawpsan siang sipsip chih lampang gen hi. Hun paisa dan a mawk heh phutphut chihte leh paukam hoihlou (*zahnoh leh gensiatnate*) zang nawnlou a, omdan leh kampaute a chituam di'a Pathian in gingtute hon lamem ahildan Paul in a genna ahi.

**T. 9-11na.** "Mihing lui a thilhih toh na *suahkheta* uh chih mu un, kuamah kizuausantuah kei un, mihing thak in na kivanta ngal ua; huai mihing thak asiampa batpih bang a theihna a siam thak in a-om lallel hi."

Khrist' sihna tungtawn a i mihing lui uh thah leh

suahkhiak a om ahihman in kampau siangloute leh omdan hoihlou himhim gingtute hinkhua a teeng theivual hilou ahildan genna in Paul in "*suahkheta*" chih thumal hon zang hi. Huan Khrist' thohnawanna tungtawn a Khrist a mihinna thak i neih pen uh genna in Paul in "*kivanta*" chih thumal hon zang nawn hi. Gingtute' mihinna thak in asiampa deihlam thei a, awlawl a Pathian batna a khang ding ahildan leng Paul in gen hi. Huaiziak in, Khrist a Pathian batpih i hihman un chi-le-sa, nam leh dinmun a kideidanna *ahihke'h* chituamna himhim omlou a, gingtu tengteng a kikum vek i hildan uh leng Paul in **t. 11na** ah Chiangtak in gen hi.

**T. 12-14na.** "Huaiziak in Pathian mitel, misiangthou leh deihtakte bang in lainatna lungtang, migitna, kingaihniamna, thunuaulutna, thuakzohna in kivan un... Huan huai tengteng tung ah itna silhthuah un; huai in thil bangkim kituaktak in agakkhawm hi."

Paul in **t. 5-8na** sung ah ei gingtute'n i paihkhiat *ahihke'h* koihmang ding toh kisai tampi a hon gen khit in, **t. 9-11na** ah mihing lui sihsan khinta a mihinna thak neite i hihdan uh hon gen nawn hi. Tun ah, huai mihinna thak neite kithopna ding toh kisai **t. 12-14na** sung ah Chiangtak in hon gen hi. Gingtute kithopna ding a Paul in a deih tuh "*lainatna, thuaktheihna, ngaihdamna* (Pathian' ngaihdamna pansan a midang ngaihdam ding) leh itna" ahi. Hiai teng lak a a poimoh diak pen "*itna*" ahihdan genna in Paul in "*silhthuah*" chihleh "*thil bangkim kituaktak in agakkhawm*" hon chi hial hi. Huai tuh itna tellou a *lainatna, thuaktheihna, leh ngaihdamna* i chihte bukim theivual hilou ahihziak ahi. Hiaite in ei gingtute kithuam lehang Pathian mitel, misiangthou leh deihtakte i hihna uleh i chituamna uh kilatna hiding hi.

**T. 15-17na.** "Huan Khrist khamuanna in na lungtang uah vaihawm hen..pilna chiteng a kisinsak leh kihilhtuah a om in, **kipahna**

*lungtang toh Pathian kiang a phatna late, Pathian late, khalam late sa in om un. Pa Pathian kiang a kipahthu gen kawm in Toupa Jesu min in hihvek un.*"

Hiai a "*Khrist khamuanna*" kichi tuh Khrist ziak a Pathian toh kilemkiknawna tungtawn a gingtute'n khamuanna i neih pen uh genna ahi. Khrist a thil siamthak i hihdan uh phawk a, kipahna lungput toh gingtute khat-le-khat kilemtak a om di'a pumpi khat a bawl i hihdan uh genna leng ahi. Paul in **t. 16na** ah Khrist' thute suut a poimohna leh gingtute'n i lungtang ua Pathian' thu dimlet zeen a i tensak ding uh poimoh ahihdan gen hi. Tua bang hileh gingtute' kam a kipan khalam late leh phatna late hong luangkhe ding a, huaite'n ah midangte (*ginna a i sanggamte*) lamtou ding ahihdan Paul in gen hi. Hiai kilamtouhna ding toh kisai in Paul in "*kisinsak*" leh "*kihilhtuah*" chih thumal hon zang hi. Thumal "*kisinsak*" in thudik kipiaksawna gen a, "*kihilhtuah*" in thil diklou



hihlou di'a kivauhilhna leh kihanthawwna lam kawkh hi. Gingtute'n thilhoihte khatpeuh Jesu Khrist tungtawwna a Pa Pathian kiang a kipahthu gen kawm a hihvek ding ahihdan Paul in saptuamte a sinsakna ahi.

**Thukhitna:** I Laisiangthou bulsuutna tungtawn in ei gingtute tuh khovel ah khosa himah lehang leitung mi hilou a van mi i hihdan hilh in i om uhi. Tua ahihman in, vangam mite'n leitung thilte khiaklah a neilou a vanlam thilte mah lungguh a i neih ding uh ahihdan i Laisiangthou in hon sinsak hi. Khelhna tuamtuamte akipan kikemsiangthou a, Khrist etlawmna a kithuam a khovel mite laka chituam ding a Pathian in a hon lamette i hi uhi. I niteng hinkhua ua kipahna lungtang toh Pathian phatna late sa a, khat-le-khat ginna a kilamtou di'a ei gingtute i Laisiangthou in hon lamen ahihdan chetna in i Laisiangthou bulsuutna sung ah "kipahna" chih thumal tamveipi kimu hi.

*Toupa'n bangkim Ama' thupina ding a sem thei ding in ei simtute hon vualzawl hen aw!*

**LAIBU ETTE:**

**Dunn, James D.G.** *The New International Greek Testament Commentary: The Epistle to the Colossians and to Philemon.* Grand Rapids, MI: The Paternoster Press, 1996.

**Geisler, Norman L.** "Colossians." *The Bible Knowledge Commentary: New Testament.* Eds. John F. Walvoord, Roy B. Zuck. Colorado Springs, CO: Cook communications Ministries, 2004.

**Hendriksen, William.** *Baker New Testament Commentary: Expositions of Colossians and Philemon.* Grand Rapids, MI: Baker Books, 1964.

**MacArthur, John.** *The MacArthur New Testament Commentary: Colossians.* Chicago: Moody Press, 1992.

**O' Brien Peter T.** *Word Biblical Commentary Volume 44: Colossians, Philemon.* Waco, TX: Word Books, 1982.





# Gammial Aw

*Missionary-te leh khamangthang dingte itna ziak a thilpiak leh thumna a na pang gige A misiangthoute i Toupa leh Hondampa Jesu Khrist min in chibai kon buk hi. Pathian hoihna ziak a tuni dong a gamna sem a kalsuan a, semthei lai i hihman in hamphat huai i sa mahmah hi. Nidang lai bang a zaleentak a tangthupha tangkoupiah a kalsuan thei nawnlou i hihdan i phawk a, himahleh Toupa'n A gamna i sepna ding mun kihawng leh A thu tangkoupiah theihna ding lam chituamtuam a kong hon hong sak zel ahihman in kipahhuai i sa mahmah hi. Tuin, Field a semtute kalsuanna leh A misiangthoute thumna tungtawn a Toupa'n i kalsuanna hon ompihna leh gah hon piaknawn hiai anuai a bangte enkhawm nawn ni.*

## A. HIMALAYAN MISSIONS FIELD

KIPAHTHU GENNA LEH THUMNA DINGTE:

1. September khasung a gingthak mi 07 (*Basbari-1, Jorethang-1, Sangratar-2. Kamla Bagan-2, Bihidin-1*) Toupa'n hon piakte leh Baptisna tangthak 09 (*Khedok-2, Basbari-3, Shantinagar-3, Ektin-1*) hon piakte ziak in kipahtu gen ni. Gingthak leh baptisna tangthakte a khalam kalsuanna ding uah gingtu hoih, gin-om, chitak leh kuhkaltak a Khrist nungzui a hong hihtheihna ding un thumpih ni.
2. Field a Toupa gamna i sepna vualzawl a om zel in, gingthak leh baptisna tangthak hong omzelte ziaikin kipahhuai i sa mahmah hi. Semtute'n Pathian kha ompihna toh thanuam tak a hon sepzom zel theihna ding un thumna in phawk ni.
3. Saptuam leh semtute lak ah sa-le-kha a chidamlou leh buaipih ngailawtuam ding omlou a lamzangtak a Field a semtute kalsuan zel thei ahihman un kipahtu gen ni.
4. Field mahni khe a kidin (*Indigenization*) ahihtheihna ding a panlakna leh kisakkholhna paizom zel ah kihanthawwna hun leh kinavaksakna hun hiding a Field Executive Committee in

saptuamte vehna a neih uh hong gahsuhna ding in thumna in phawk ni.

5. Nepal EBC sung ah heutu makai ding Toupa lau, Saptuamte it leh mi ginom leh chitak heutu hoihtak Toupa'n hon piakna ding in thum ni.
6. Semtu hisate'n sa, lungsim leh kha chidamna hoihtak toh hon sep ua, khamangthang ding veina puakgik lian sem hon neihbeh zel theihna ding un thumpih ni.

## **B. DHEMAJI MISSIONS FIELD**

KIPATHU GENNA LEH THUMNA DINGTE:

1. Pathian vualzawlna ziak in Pastor S Thangbiakmang leh a lawinu'n gil a gah goutan tapa kha paita in chidamtak in nei uhi. Kipathu gen in, naungek leh a nu hong chidamna ding in thumpih ni.
2. Field a tuel a damlouna chi tuamtuum nei bangzah hiam omte Toupa hihdamna ngetsak ni. Amaute hong damsiang ua taksa, kha leh lungsim a hong chidamna ding un thumpih ni.
3. Evan H Jamkhanmang in kumlui December 31, 2022 a gari accident ziak a Workshop a sawtpi a om nung in Pathian vualzawlna toh October 10, 2023 in lakkhiak theih a omta ahihman in kipathu gen in, Pathian vualzawlna toh lamzangtak a hon zatzom theihna ding in thumpih ni.
4. Pathian in i thumnate hon dawngzel in, damlou Rupa Kutum leh Jyoti Charah-te ahidam man in kipathu gen ni. Amaute taksa lam leh khalam a hong hat ua, chidamna hoihtak hon neihna ding un thumpih ni.
5. Field a semtute'n Mishing pau a ngaihtheih ding Nasepte Laibu Audio Bible hawmkhiakna neitheih ahihman un manpha i sa hi. Pathian in A thu a vualzawl a, a ngaikhetete a ding a vualzawlna ahihna ding in thumna in phawk ni.
6. Amguri a khosa Mr Niranjana Kuli leh Pondinor Pegu te'n Jesu Khrist a Lal leh Hondampa ding ua a santheihna ding uh leh Pityang a om, Mr Jyoti Pait leh Mr Sarmah Pegu-te semtute tungtawn a counselling piak a omlel te'n Jesu Khrist Lal leh Hondampa ding a a san theihna ding un thum ni.

7. Field a semtute'n maban a tup-le-ngiim a neih uh gingtute lak a kisinsakna tuamtuam sai ding chih ahi. Hiai kisinsakna in gah kipahhuai hon suanna ding in thumna in phawk ni.

### C. MANIPUR MISSIONS FIELD

#### KIPAHTHU GENNA LEH THUMNA DINGTE:

1. Pathian pina leh ompihna toh semtute bittou zel uhi. Semtute'n September 29, 2023 a Workers' Fellowship neih ding a sawm uh himahleh phaizang a sinlai naupangte kiphinna ziak in paikhawm theilou uhi. Himahleh, semtute'n Pathian ompihna toh hunlem kibawl in September 30, 2023 zing baihtak a paikhawm a neitheh ahihman un manpha i sa hi.
2. Semtute panlakna toh buaina kawmkal ah hun thoveng Toupa'n semtute pia in biakkhawmna, thumkhawmna leh kihanthawmna hun daltu omlou a zangthei zel ahihman un kipahtu gen ni.
3. Manipur gam buaina dai deuhta a theih ahihman in semtute a station ua a omkik uh deihna in October khasung a amau station chiat a pai ding a theihsakna bawl a om bang a hong paitheih ua, gahsuah leh lohchingtak a Toupa gamna semtute'n hon sepzom theihna ding un thumpih ni.
4. Manipur Missions Field nuai a gingtu omte semtute tungtawn a report i ngah dan in a ginna uh lenkip leh dingkip uh chih zak ahi. Amaute'n leng a hihtheihna zahzah ua thumna leh thilpiak ah a na pangtou zel ahihman un manpha i sa hi. Haksatna i phawkpihlouh uh a tuah uh leng om thamtham ding ahihman in thumna tampi toh delhzui ni.
5. Semtute'n amau bial leh a kep uh memberte vehna leh ginna uh bahlou a hangsan zaw leh chitak zaw a om ding uh deihna in amaute vehna nei zel uhi. Hiai hunte ah tampi a kithuahkhawm lemlou kia hilou a thawmnei a om hoihlou ahihman in lasak chihte tellou in sharing, thumna leh thilpiak kaihkhawmna hun a zat hi tangpi hi. Ahihhang in, mun khenkhat ah ngeina bang phial khop a biakkhawmna neitheh uhi.
6. School Ministry tungtawn a sepna ahihleh lamzangtak in paitou theizel hi. Academic Session pailen ah Naupang 400 val om himahleh buaina ziak in bangzah hiam mundang ah kisuankhia uh ahihman in tulel in 367 vel om hi. Khosung a pawlpi tuamtuamte'n naupangte lak a devotion neih khaam himahle

uh Principal panlakna ziaak in sinsaktute devotion neithei veve ahihman un kipahhuai i sa hi. School ministry gahsuaah leh lohching hong hihna ding in thumna tampi toh delhzui zel ni.

7. MEBCC Thamnapokpi ah Pastor L Amuba panlakna nuai ah mipi biakkhawmna nei thei zel uhi. Gam buaina in naaktak a hon nawk himahleh September 24, 2023 in mi 3 in Jesu a Lal leh Hondampa ding in sang uhi. Hiai bang buaina nasatak i tuahlai a Pathian in honpi dan thupi i sa a thupina tengteng Amah i pia hi. Toupa'n gingthak hon piakte a ginna ua hong dinkip ua, a mi-le-sate lak ua Khrist tanchinhoih tangkoupihtute hong hihtheihna ding un thumpih ni.
8. Semtu station a omthei Licentiate Pastor P Anand, Evan. Ch.Jano, Evan. Th Ingocha, Evan Y Prembala, leh Evan. N Joykumar-te doudalna leh vauna apan Toupa'n a kepbitna ding un thumna tampi toh delhzui ni. Ban ah, semtute a sepna mun ua om leh lutkik lunggulh omte mun khenkhat ah buai paulam in semtute lut phallou uhi. Toupa'n kong a hon honsakna ding in thum ni.
9. Field in maban etna toh Budget leh Year Plan 2024-2025 ding kikupna leh maban pai dingdan genkhawmna nei uhi. Hiai toh kisai Field in a taksap leh poimoh genkhak a omte hong taksuahna ding in thum ni.
10. Field BDC in tukum a Year Plan ua Dorcas Khawmpi October 03, 2023 a neih ding a sawm uh gam buaina a sousan thak ziaak a neitheilou himahle uh, October 14, 2023 in Thamnapokpi mun ah lamzangtak leh hihbuaitu bangmah omlou a Pathian ompihna tang a neithei ahihman un kipahthu gen ni.

#### **D. HOJAI MISSIONS FIELD**

##### **KIPAHTHU GENNA LEH THUMNA DINGTE:**

1. Manipur buai ki pattung in Field a semtute'n bazaar nupi khenkhat apan enghouna zamun mahmah himahle uh tunitan namkal buaina ziaak a haksatna tuamtuum tuaklou a om thei ahihman un kipahthu gen ni.
2. Hojai Field a i sepna a semtute'n tulel in Meitei khua Mainapathar ah Home Tuition kalkhat in nili (4) zel neithei uhi. Tuition ah naupang 25 vel paikhawm theizel uhi. Home tuition ahihleh tanchinhoih puanzak nasepna poimoh tak ahih ban ah lawmbawlina dia vanzat poimoh ahihman in manpha i sa hi.

3. Semtute leh gingtute banah sepna ziak a Hojai pansan a gingtu omte'n Fellowship Centre, Rampur, Hojai ah tunitan dalna omlou in Pathianni chiang in biakkhawmna neitheih uhi. Pathian ompihna tang a gingute'n biakkhawmna hon neihzel theihna ding un thumpih ni.
4. Tulel a field a semtute'n houlimpih a neih uh mi bangzah hiam omte'n Jesu Khrist hon theih chiang sem ua, hotdam hong hihtheihna ding uh leh Hojai a Meiteite lakah Khasiangthou in nna hon sep a Khrist khebul tut ahih theihna ding un thum ni.

### **E. DIMA HASAO MISSIONS FIELD**

#### **KIPAHTHU GENNA LEH THUMNA DINGTE:**

1. Naupangte lak a Tuiton tungtawn a Pathian gamna i sepna paitou thei zel a, naupang leng kibehlap tou zel ahihman in kipahhuai i sa mahmah hi. A kallak in, semtute'n Pathian thu leh laate sinsak thei zel ua manpha i sa hi. Naupangte tungtawn a tangthupha gen a omte'n chi a hon tuhna ding in thumna in phawk ni.
2. Semtute'n tuiton a lakna kim leh kiangte ban ah naupang nu leh pate kiang a vak in, houlimpih theih ding mi lemtang omte houlimpihna neitheih zel ua, himahleh Pathian thu genpih ding lemtang vek nai louhna mun leng om hi. Houlimpihsa mite kiang a Pathian khasiangthou in nna a hon sepna ding in thum ni.
3. Field a semtu omte'n khateng a amau hihtheihna zahzah suah a kalsuan zel in damlou vehna, thumkhawmna hun, Anngawl thumna leh Pathianni chiang a kithuahkhawmna hunte zangkhawm theizel ahihman un manpha i sa hi.

### **F. GOALPARA MISSIONS FIELD**

#### **KIPAHTHU GENNA LEH THUMNA DINGTE:**

1. Salam leh khalam kikepna toh kisai semtute'n Pathian ompihna toh sep-le-bawl ding om bangbangte sem in kalsuan thei zel uhi. Fellowship leng neitheih zel ua, tua hunte ah semtu innkuante kia hilou in Goalpara kiim a sepna nei omkha bangzah hiamte leng a man hunhun ua va kihel thei zel ahihna uah manpha leh kipahhuai i sa hi.
2. Siamsinna tungtawn a Pathian gamna sepna a kalsuanna a, tua tungtawn a lawmbawl theihna ding ngimna a semtute'n

tuition a pat uh tuni tan lamzangtak in paizom theizel hi. Tulel in, naupang 04 omlel a, maban a hong kibehlap touh zel lametna lianpi i nei hi.

3. Semtute'n khalam leh salam kihihatna leh kihanthawn tuahna ding ngimna in a vangkim in thumkhawmna hun zangthei zel uhi. Hiai hun ah thupi tuamtuam pansan in thumna point ding kaikhawm in thumkhawmna hun zang zel uhi.
4. Rabha namte a lungsim uh a khauh ban ah a society uh a khauh ziak in deihbang in semtute'n kalsuan thei taktak lou uhi. Pathian in a lampi hon honsak a, hiai minamte lak ah tangthupha chii a kituh theihna ding in thum ni.

### **G. KAMRUP DISTRICT A SEPNA DINMUN**

#### **KIPAHTHU GENNA LEH THUMNA DINGTE:**

1. Evan Kaplun Paite, Chaigoan Area a semtu ding leh Survey bawlkawm ding a mohpuakna heutute'n a piak dungzui un Pathian ompihna toh lamzangtak in kalsuan zom thei zel hi. Rabha mite khua tuamtuam (Rehabari, Kahuwa, Borsar leh Bamuni Goan) sik in kalsuan thei zel hi. Toupa'n semtute kalsuanna a vualzawlina ding in thumna tampi toh delhzui poimoh i sa hi.
2. Rabha namte a sahkua uh kulmut thei mahmah ahihman in amaute kimmeltheihpih ding a zon leng haksa mahmah ahihman in thumna in semtu i neihte a ding in thumpih ni. Rabha mite ahihle mi neizou, kuamah englou, mahni kitoudelhzou ahihman un kuamah ngaihsak ut khollou ahihna uah sepna ah leng nawngkaina om kha thei ding in i lamen hi. Thumtute'n thumna tampi toh i delhzui poimoh i sa a, theihtawpsuah a i semtute hong pan theihna ding un thumpih ni.
3. Evan M Daizachin, Loharghat Area a semtu in Pathian ompihna toh Korghar, Garilik, Rani Bari leh Bagan khuate veh in kalsuan thei a, mi bangzah hiam toh leng kimmeltheih tuahna hiai khuate apan bawltheita ahihman in kipahhuai leh manpha i sa hi. A sepna mun a mite houlimpih a neihsate a chang in sunzom thei kei mahleh Toupa'n i thumnate hon dawng in Mrs. Taramoti Rabha, Miss Anita Rabha leh Mr. Joy kumar Tanti te Pathian thu a houlimpih theih ding piak a i om man in kipahthu gen ni. Maban a amaute houlimpihna sutzop theih hong hih a, Khrist khebul a pilut hong hihna ding un thumna a phawk ni. ■



# DORCAS *Corner*

Toupa hoihna leh chitnate ziak in November kha pikai in i omnawn a, Pathian min i phat hi. Simtute Toupa Jesu Khrist min manpha in chibai k'on buk hi. Tukha Dorkapawl in thupi a i neih, 'Thilpiak tungtawn a Pathian limsakna' chih toh kisai saulou in houlim ni.

"Pia un, huchi in piak in na om ding uh, hoihtak a teh a, hengk a, singak a, letnawinawi in na angung uah piak in na om ding uh. Noumau tehna mah a tehsak a piak in na om ding uh a hingal a, a chi hi" (Lk.6:38).

Thilpiak thupipen tuh nang leh kei khial a siding i hihlai in khelhna neiloupi Pathian in a Tapa tang neihsun Jesu Khrist Khros ah migiloute khut a si in tatna hon bawlsak a Tangtawn hinna ah hon pilut ta hi. Tua Tangtawn hinna i tan tuh vualzawlna thupi petmah, mihing piakzoh vual hilou Pathian a kipan i tan a hi. Sam gelhtu in, 'Ka tung a a thilhoih hih tengteng ziak in Toupa kiang ah bang ahia ka piakthuk sam ding?' a na chi hi. Toupa'n na tung a a thilhih thupite ngaihtuah detdet mah dih, vualzawlna simseng louh na hinkhua a na tan om ding ahi. Thilpiak himhim neihman hauhman a sepkhiak hilou a, itna, lainatna leh phalman hizaw hi. Huai tuh Pathian limsakna tungtawn a sepkhiak a hi a, a vualzawlna toh kizui lai hi. Pathian in a namtel Israelte kiang a thupiak phatuumngaitak a zuih teitei ding a piak tuh, "...na unau zawngte mudah a bangmah penuamlou in na lungtang uah diklou tak a ngaihtuahna omlou ding in pilvang un. Hichilou in zaw, amau na tungthu uah Toupa a sam ding ua, nou a din khelhna a hikha ding. Na piak ngeingei ding uh a hi. Na piak Chiang un leng na lungtang uh a nuammoh ding ahi kei. Huchibang thil ziak in a hi, Toupa na Pathian un na thilhih



tengteng uah leh na khut ngakna peuh uh a hon vualzawl ding hi” chih a hi (Diut.15:9-10).

Vualzawl na deihlou kua i om a? A deihlou ki-omlou ding, himahleh vualzawl na lampi tawn khalou a omkhak nilouh theih hi. Vualzawl na lampi dik leh tang Laisiangthou thu in hon hilh tuh thilpiak tungtawn a Pathian limsak ding a hi. Huai tuh neih man hilou, hauhman leng hituan samlou in piak ding a poimoh leh lungsim a tup bang in kipaktak a piakding chih ahi. Pathian in kipaktak a pemite it ahih ziak in Amah kipahlam sep kithalawp a piak ding ahi. Jesu'n, Mihaute'n sum kholna a sum a khiaklai uh a mu hi. Meithai zawngtak kuahiam in dal dangka muza nih (huai tuh paihsa khat hu) hong khia leng a mu hi. Huchi in, “Chihtaktak in k'on hilh ahi, hiai tengteng sang in tua meithai zawngtak in a khe tamzaw. Hiai tengteng in a neihlet uh a khia ua; aman bel a kitunding nading a a neih sunsun a khevek” a chi hi (Lk.21:1-2). Tua banah, “Zakai a ding a, Toupa kiang ah, Ngai in, Toupa, ka sum kimkhat tagahte kiang ah ka peding a; kualak ah leng thil bangpeuh na negu taleng, a lehli in ka din ding” a chi hi (Lk.19:8). Meithai zawngtak leh a thilpiak tawmchik bang chidan a Toupa'n tampen chi ahi di? A petu lungsim Toupa'n en a hi. A kitunding nading, a neihsunsun pia ahi. Nang leh ken huchituk a tawm nei le i pe diam? Kei a di leh ka thohlawm ding kidaihloou kichikha ding hi. Ama'n bel sih leh sih dam leh dam chi in a pia hi. Toupa' lungtang sukha in petampen a suak hi. Zakai hihna i theihchiat sa a hi. Nekkuk a kihihhau pa mitengteng in mikhial hi a a theih pa uh ahi. Himahleh Jesu toh hong kituah chiang un a sumneih kimkhat tagahte kiang a piakding lungput nei in Pathian limsakna leh kiphalna hon nei hi. Mi a diklou tak a a lakte leng a lehli a dinding in lungsim kimanna toh om hi. Hiai ahi thilphalna i chih, min Pathian toh kizopna taktak a Amah limsakna honneih chiang in neih leet hilou, hauhman leng hisamlou, Pathian vualzawl na tan bangbang phaltak in pekhia uhi. Thilphaltak a Pathian limsakna toh i piak leh a gah/a gun Pathian in eilam ah hon peding hi. Kisaktheihna ding leh kiminthansakna ding

in pekei ni, pilvangtak in pe ni. “Na thilpiakte uh mi muhding in, mihing mitmuh a hihlou ding in pilvang un; huchilou in zaw na Pa uh van a om kiang ah kipahman na neikei ding uhi. Huchi in, mi kiang a thilpiak na piak in, mi lepchiahte’n mi phat a lohtheih nading ua kikhopna inn leh kongzing a a hihnak bang un na ma uah pengkul mutkei un. Chihtaktak in k’on hilh ahi, a kipahman uh a muta uhi. Nang zaw mikiang a thilpiak na piak in, na khut taklam in ahih na khut veilam in theikei hen. Na thilpiak a guk a a-omtheihna di’n: huchi in na pa a guk a mupa’n a hon din ding hi (Mat. 6:1-4).

Israelte’n Toupa omna, kihoupihna puanin bawlna ding in thilpiakte a hon tawikhawm uhi. Michih a lungtang a tothohte, lungtang a utna neite- Toupa’n Mosi tawn a thu a piak a, van bawlna ding a chih tengteng bawlna ding in Israel suante, numei leh pasal te’n amau utthu in thilpiakte Toupa mai ah hontawi uhi (Eks.35:20-29). Zingsang teng in tampi a hon tawi ua, utthu a piak thillatte a kiang ah hontawi uhi. Nasepna dia hunzah sang a tamzaw a hon tawita uhi. Mosi thupiak in giahphual ah a tangkou uh a, michih numei pasal hitaleh kuamah in thilpiak penawnlou ding, mun siangthou a van bawlna ding in a daih valta, kiching lota chi in kikham hial uhi (Eks.36: 2-7). Mi kuapeuh in Pathian a kipan vualzawl nate sim lehang phutluh thu hilou in i kipahna zahzah a tothoh a om in huai mah ah i Pathian limsakna leng hong kilang pah ding hi. Sawltak Paul in Philippi Saptuamte kiang ah, ‘Thilpiak ka zonziak ahikei a, nou ading a gahpung ka zong a hizaw hi’ a chi ngutngut hi (Phil.4:17). Paul nasepna ah Philippi te’n Thessalonika khua ah a taksap awng huksak in thilpiak ah nasatak in a huh ua, Paul a kipak mahmah hi. Ahi a thilpiak pawng zon hilou in gingu saptuam te’n tuabang na a seppen uh amau ading a gahpung vualzawl na amau mah in a tanna ding uh lampi bawl hizaw hi. Piak a omte sang in a pekhetehte’n kipahna sangzaw nei in vualzawl na dong semsem uhi. “Lak sang in piak in lukhawng neizaw hi” chih ahih bang in, a lukhawng nei ding i thilpiakte tungtawn a Pathian limsakna tawisang chiat ding in Toupa’n hon vualzawl hen. ■



# YOUTH *Corner*

## NA HUN KHEMPEUH A HOIH LAM IN ZANG IN

*“Nite a hoih louh jiakin hun na neih sung un atam theipen sem zel un.” Efesa 5:16*

**HUN HOIH NAWNLOU LUA:** Tulaitak i teenna gam uh Manipur hun se mahmah hun ahi. Hun dangte tawh et in hun hoihlough pen hun hiding in koih theih hi. Bangziak hiam i chih leh Meiteite thu bawl in Zosuan milip zaval bang in sihna tuak in, biakinn zanih val kihalsia in, inn leh lou, neih leh lam aza-asim kihalsia-in, i tuailai pih nungakte uh kibawl sia-in kithat lai hi. Tu-in kha li (4) valkhin napi-in, Centre kumpi apan bangmah lam-et ding sepkhiaht taktak om nailo lai hi. Tulaitaka i tuah uh thupiangte apan in, hun hoih lou mahmah, hun sia mahmah sung ah om i hihna uh haihvual hilo hi. I kum thupi uh hi-in vaihawm thupite uh hitaleh hong kituak khawm mahmah hi-a theih in om hi. Hiai banga hun se mahmah sungah bangchi bang in i hunte uh a hoih lam in i zang thei dia?

**TU HUN MANPHATNA MUCHIAN IN:** Hun manphatna tawh kisai-in ei Zomite sang in Sapte’n na mu chian zaw uh a, “Time is Money” na chi uh hi. Mi khempeuh apil ahai; a zawng-ahau tungah Pathian in akibang in hun hon pia hi. Mi khempeuh in akibang in nikhat dakkal 24; kum khat ni 365 hun i nei chiat uh hi. Mi khat in agenna-ah kuate in hun manphat dan theichian pen ding hiam achihna-ah, sih ding ngaka damlou gim mahmahte’n theichian pen ding uh, chi hi. Tua mah bang in Meidil sung tung khinte ading in tu-a i hun neih, hotdamna hun bangzah takin manpha ding hiam, chih mi hausapa leh Lazaras tangthu apan in i theithehi hi. Tua hun-ah tui tak khat lel natawm haksa ding ahihna i mu hi. Mihausapa din

mun in na kikoih lechin, tulaitak a na hun manphatna na theichian sem ding hi. 2 Kor 6:2 ah *“Hun kipahhuai ah kon ngaikhiaa, hotdamna ni ah kon panpih, a chi ngal a. Ngai un, tu hun kipahhuai ahia; ngai un, tu hotdamna ni ahi”* chi hi. Heb 3:15 ah *“Tuni in a aw na zak chiangun a hel lai bang un, na lungtang uh khauhsak kei un a kichih laiteng”* na chi hi. Tu-a i hun pen hotdamna hun, hehpihna hun hi-a, hiai hun thupi leh poimawh thudonlou a i om khak ding lauh huai mahmah ding hi. Mihingte tungah Pathian in hinna khat chiat hong pia hi. Hiai hun pen phakna chiang (limit) nei hi-a, siat hun bei hun nei ahi. Mosi in, leitung a i damsung hun sung pen kum 70 bang hi a, hatna (dam theite ading in) ziak in kum 80 bang hi thei hi, na chi hi. Hiai hun sung nangawn natna, sihna leh lungkhamna tuamtuum tawh kidim hi. Amanpha thei pen in zang in.

**NA HUN ZANGKHAL KHA KEN:** Tu-a i hun pen tangtawn mun tun theihna ding in kisakkholhna hun ahi. Tua ahihman in Sawltak Paul in Efe 5:16 ah *‘Nite a hoih louh ziaikin hun na neih sung un atam theipen sem zel un chin hon hanthawn hi. ‘Hunte a hoih lam a zang ding’* chih chiangin Greek pau bulah, *hun leikhia, tankhia* (Redeeming) chihna hi a, i mansuah ding na khat akikhelma in tankhia (ransomed) leikhia chihna hi chi hi. Laisiangthou ah hunpi nih om a, Leitung hun leh tawntung hun ahi. Leitung hun pen tu-a i hinkhua hun hi a, denchiang in abeipahta ding *limited time*-sekhitsa ahi hi. Tawntung hun pen Pathian kumpi gam hun ding hi a, den chiang in a hong tungpahta ding tawntung gam (eternal life) hun ding ahi hi.

Na hun neih khempeuh a hoih lam in zang in, chih chiang in tawntung mun tun theihna ding in tu-a na leitung hun-limited time zang manpha ding – tua diing a, leikhe ding chihna ahi. Jesu’n talent pungsakpa tawh agenteh mah bang in, tu-a na hun, a pung bawl siam leh denchiang kumpipa hong tun chiangin a pung tampi tawh-hin tawntungna sung ah hon lutpih ding hi. Hiai thu a theisiamlou mihaite bang

lou in, mipilte bang in om ni, leitung ading kia in i hun khempeuh uh pung ding a bawllou ding, tawntung ading suahtakna ding in a pung a bawlna in i zang manpha ding uhi. Abeisa hunte i lawh theih om nawnlo hi. I mailam hoih ding thu a, tu-a i hun zat dan ah ki nga hi. Pathian in hon piak hun kepna pen nang leh kei mawhpuaq ah kinga hi. Nikhat ni Chiang in na hun zat dan-ah na kisiklouh-a, na lungkim theihna ding in, tu-a na hun neih khempeuh a hoih lam in zang in. Hiai thuguk pilna a i neih theihna ding in Mosi bang in Pathian kiang ah pilna ngen ni. Sam 90:12 *“Ka damsung nite uh simdan honhilh in, pilna lungtang ka neih loh hialna ding un.”* Galatia 6:9-10 *“Huchiin, thil hoih hih chintak kei ni; i lungkiak keileh a hun takah i at ngei ding ahi ngala. Huchiin, lemtang hun i neihdan bang zel in mi tengteng tungah thil hoih hih ni, ginna inkuanpihte laka omte tungah hi khol diak hen.”* Philippi 3:12-16 *“Hiai tangkhinta ka hi keia, bukimkhinta leng ka hi kei; ahihhangin huai mah keia hihsak tumin ka delh teitei ahi, Kris Jesun keipen amaha honhihsaktak jiakin. Unaute aw, tangkhintain ka kingai keia: ahihhangin thil khat bel ka hih- nunglama omte mangngilhin malama om pen ka delh hi; Kris Jesua Pathian sapna sang kipahman mu ding in phak chiamna tuh ka delh hi. Huaiziakin i lak ua a piching deuhdeuh bekin huchibang lungsim i nei ding uh: huchia thil peuhpeuha lungsim dang na neih un tuh, huai tuh Pathian in nou a hontheisak ngei ding hi. I hongtunna, i ngah Chiangchiang uah muanhuaiin kip peuhmah ni uh.”* Jakob 4:17 *“Huchiin kuapeuh thilhoih ding thei a hihtuanlou tuh amaha ding in khelhna ahi.”* 2 Korin 5:9-10 *“Huaijiakin, omin, om kei leng, amah kipahpih lam mi hih i tum chinten ahi. Michih in, pumpia thil hihte a sia a phain, i hih bangbanga i muh chiat theihna ding in, Kris thukhenna tutphah maah hihlatin i om vek ding uh ahi.”*

Na hun khempeuh a hoih lam a zang manpha ding in Toupa'n hong ompihtha hen! ■



# CHILDREN'S *Corner*

EBC sung a department kahiang poimoh mahmah Baptist Children Department (BCD) in amau department chiamtehna logo thak bawl ding EOM in phalna a piak dungzui Logo thak zat theih ding in bawlkhiak hita. Hiai logo thak pen Headquarters, Division leh local BCD in a na zang chiat ta ding in i kitheisak hi. Logo leh a genchetna hiai a nuai a bang ahi. Logo EBC website: [www.ebc-india.org](http://www.ebc-india.org) ah muhtheih ding hi.

## BCD LOGO LEH A GENCHETNA



1. **INNER CIRCLE SUNG:** EVANGELICAL BAPTIST CONVENTION sung a Pathian in kepding a hon piak NAUPANGTE, LAISIANGTHOU (BIBLE) sinsakna bang a KHRIST BATNA (KHROS) nei a KISINSAKNA (Sunday School) etsakna ahi.



2. **MIDDLE CIRCLE:** Department min BAPTIST CHILDREN DEPARTMENT leh a thupi NAUPANGTE KHRIST A DING IN kichi taklatna ahi. Hiai Circle a CANDLE nih te'n vak (Pathian thu vak) ensak hi.



3. **OUTER CIRCLE:** Hiai Circle a OLIVE TEH zamtoute'n tunglam VAN AKSI te omna manoh uhi. Sam laibu in naupangte Olive selnou bangin na genteh hi. (Sam 128:3). Van Aksite'n VAN GAM, Pathian omna a ensak hi. Naupangte van gam, Pathian kiang a tun dong ua khangtou ding etsakna ahi. ■

# R eport

## **RELIEF SUB-COMMITTEE NASEPNA:**

Gamsung buaina ziak a haksatna tuak Saptuam mite khotuahna tualsung Saptuam bang, Division bang, leh Headquarters bang in theihtawp suah in panla tou zel hi. A kilangkha leh kilangkhe lou ah leng tasamte taksap huksakna ah kuapeuh in panla siausiau a theih ahihman in kipahhuai hi (Eph.2:10). Tunai a EBC Relief Sub-Committee tungtawn a Saptuam' kalsuanna tuamtuan tamlou hiai ah i taklang hi.

September 22, 2023 in pianken a tuambikna neite Evan Thangsuanpau makaih in fellowship neihpih ahi a, huai hun ah nektak a huhna in Antang 17bags, Dal- 34kg, Manggan- 34kg, Chi- 34kg hawmkhiak ahi.

September 22, 2023 in G Mawnglian ah nektak zonna khek dia thupukna bawl saptuam mi inkuan 34 kiang ah relief "Haichi" tamkhop man ding DS LND tawn a piak ahi.

September 30, 2023 in Lamka khosung a Ambulance driver-te adi'n CVDF khut ah antang 19 bags piakkhiak ahi.

October 4, 2023 in Kangvai frontline joint mess apan nektak taksap ziak a huhna hon nget uh awlmoh in Antang- 15bag, Dal-3bags, Manggan- 2bags piak ahi.

October 10,2023 in YPA Gen. HQ apan gamsung buai ziak a haksatna tuakte huhna piak ding thohkhawm dia ngetna hon bawl uh awlmohpih in tuletu adi'n antang bag 10 piak dia thupuk ahi a, lemtang masa ah storekeeper in ana pekhe ding hi.

October 10, 2023 tan a nektak van hawmkhiak zah hiai bang ahi.

Item	Antang	Dal	Chi	Sathau	Allu	Phulun	Mangan	Sahbon	ORS
A thawn a hawm*	154 bags	50 bags	5bags 31kgs	98 boxes	20 bags	10 bags	16 bags	7 boxes (Puansawpna)	80
Division share**	1870 bags	360 bags	--	400 boxes	--	--	120 bags		
Total hawmkhiak	2024 bags	410 bags	5 bags 31kgs	498 boxes (5976L)	20 bags	10 bags	136 bags	7 boxes	80 boxes

- \* *Huhna athawn a hawmkhiakte relief center tuamtuum, frontline (duty post), training & volunteer-te kiang a piak ahi.*
- \*\* *Division share kichi saptuam mite lak a hawmkhiak theih dia, aman tawmzaw a, division office tawn a hawmkhiakte genna ahi.*

Relief & Rehabilitation Plan 2023 sepzuina September sung a hiai bang ahi

	Plan	Sepkhiakna	No. of Recipients	Amount (cost)
1.	Educational relief	Galtai student lak a tasam diakte huhna (Nur. to CI-xii)	Students -112 (Inkuan 48 apan)	Rs. 4,72,910.00
2.	Ginna Kalbi Project	Relief centre apan inluah a khosa kipan utte huhna	Inkuan 13 approval piak ahi.	Rs. 30,600.00/m
3.	Medical Asst. to IDPs	Relief Centre a IDPs haksa diakte damlouh hun a kepna/huhna	Mimal damlou pan pihna piak zah = 10	Rs. 28,740.00
4.	Bible Relief	Imphal apan hong galtaite inkuan 1 ah bu 1 chiat	Inkuan = 218	Rs. 2,98,600.00

Relief Thohlawm leng mimal khenkhat leh tualsung Saptuam bangzah hiam apan honglut panpan ta a, honglut zomzel lai dia lamet ahi. Toupa'n Saptuamte hon ompih chiat hen aw.



Kangvai Joint Mess on October 4, 2023

**LRRC A NASEPNA TOMKIM:**

1. **Lametnamun:** Lametnamun tungtawn a kikepna pai hoih zel a tuin inmates 48 kinei hi. Tukum sung in inmates 159 (a khatveina 118) kilalut a, course zou a pai 141, damlouhna ziak a damdawiinn a ki enkol leh paisak 14, course zoulou a taipawt/ paisak 26 pha hi, inmates lui tukum sung a si 8 pha hi.
2. **Hotdamna Chialpin:** Khathum hal a chialpina kinei zel 4 vei kinei hi, (i) Pastor Khamkhanchin Ngaihte, (ii) Rev Ginmalsawm, (iiii) Pastor Dinkhansuan leh (iii) Upa L



Doulamthang Counsellor LRRC te chialpina thugen in kizang hi. Inmate Jesu Khrist Hotdamna sang leh kilan thak 48 pha hi.

**3. Inmates Sponsorship:** Khosakna haksa fee pezou lou ding himahleh Lametnamun a kikep ding lunggulh, taina ding thei lou a Lametnamun hong delhte Pastor, Tualsung saptuam-department leh mimalte lak ah sponsorship ding zonsak hi uhi. Report hun sung sponsorship ngah a kikem inmate 6 pha hi.

**4. Vehna leh Thilpiak:** Tuni tan in Division/Tualsung saptuam leh departmentte (11) leh Mimal (7) -Lametnamun apan hoihkhia / kikemlelte sungkuante sim tel apan vehna leh panpihna sum, health camp, van tuamtuam - sahbon, toothpaste- brush, towel banah antang leh meh ding hon puak in inmate leh semtute a ding in thumsakna leng hon nei zel uhi.

**5. Nasep dangdangte:** Tuni tan in BCD- EBCC (i) Ngathal leh (ii) Dorcas veng te lak ah Khamtheih toh kisai sinsakna hun zat ahi. Lametnamun apan hoih khiate leh beneficiaries mi 150 toh Advance Christmas hun zang khawm in Christmas thilpiak piak ahi.

EBCC Bungmual in khamtheih hihte camp a neih hun un LRRC a semtuten kithuahpihna nna kisem hi.

## **DOTPROJ NASEPNA:**

Tuni tan DOTPROJ in masawn zel thei a aki om man in Pathian min ka phat hi. Hiai project kipat tung a kipan tuni tan in mi 44 in Training zouta in nekzawna in zangtheita ua manpha ka sa hi. Tulel a traineete leng siam lam manoh zel thei a a om man un kipahhuai ka sa hi. Office ah zing dak 9:30-10:00 sung devotion kinei zel a, pitu ding khat khat a kiese in Laisiangthou simkhawmna, sharing leh thumnate kinei zel thei hi.

DOTPROJ 6th batchna ding sintu mi 13 toh April 10, 2023 in kipan hi. Hiai hun ah Director of Development leh Dorcas Coordinator ten Orientation hon neihpih ua, kiphattuampih mahmah hi. Meitei gal ziak in a kallak in kaitheihlough hun om zel sam mah leh Pathian zar in tuni tan in trainingna

sunzawm thei in ki om hi. Tuni chiang in Traineeten amau adi khop kikhui thei ta ua manpha mahmah hi. Huan khalam pianthakna neiloute leng Dorcas Coordinator panlakpihna toh Evan.N.Thangsuangpau in counselling hon neihpih zel in khalam navak tak in hon zou zel uhi

Sum lut leh pawtte hoihtak a chiamteh zel ahi a, khabei chiang in Account sectionte toh hihfel zel ahi. Pathian leh heutute deihsakna ziaik in DOTPROJ hi salam leh khalam kisinsakna mun leh mi tampi adia vualzawl na mun ahih man in heutute leh Pathian tung ah kipahhuai ka sa hi. ■

---

## Thu Tuamtuum

### **KHALOH LAKMASAKPEN PIA:**

Miss Chingroumawi d/o Babie Chingzasia, EBCC Central Delhi a member in Master's Programme in Hotel Management, Aerocity, New Delhi a zil kawm leh sep kawm thuah a, a khaloh lak masakpen Pathian kiang a kipahthu genna in EBCC Central Delhi ah pia hi. Pathian in a maban hun ah leng vualzawl in ompih tou zel hen.

**- Upa Khamkhansuan, Secretary, TBUC CD**

Mr. Biaklall s/o Apurba Basumatary EBCC, Diphu in Assam Govrnment nuaiah Education Department ah sepna muthak hi. A khaloh lak masak pen Missionary leh GBC studentte kiang ah pia hi. Toupa'n thupina tang henla, asepnah ah ama pi zelzel hen aw!

- K. Siamzoulian, Hojai, Assam

### **KIPAHTHU GENNA:**

Mr. V Zakai Tonsing EBCC Bungmual a om in Missions Field a poimohna bangbang a zatttheih ding in itna thilpiak in sum hunkhop Dorcas Hall a Director of Missions kiang ah pia hi. A kipiakna thupi sa mahmah in Pathian in thupina tang hen. Toupa gam nasepnah ding a thilpiak tamsem pethei zel ding in Pathian in vualzawl hen.

**- Upa T Paukhansiam, Missions Promoter** ■



# EBC Innsung Thu

## ONE DAY VOLUNTEER CAMP NEIH AHI:

EBC Hqtr. Saina nuai ah i volunteer te khalam a suahtakna ding lunghimohna a nei in October 3 apan in 26, 2023 sung Olive Retreat Center, Lamzang ah camp neihpih ahi. Hiai camp phase 2 in kikhen a, phase masa date 3-13 sung ah batch 4 pha ua, phase nihna date 16-26 ah leng batch 5 a khen ahi. Camp a honglut a tangpi mi 70 apan 100 kikal pha uhi. Hiai camp a Bible neilou te Lamka South leh North Division in a poimoh bangbang uh Bible hon pia uhi. Saptuamte thumna ziak in hiai camp tungtawn in mi tamtak in pianthakna, kilat thakna, midang toh kikal a ngaihdamna leh Jesu Khrist adia nungzui muanhuai hi ding in kilan uhi. Hiai camp a honglut khua/veng 42 apan ahi. Thupina tengteng Toupa kia in tang hen.

## NEBC HILL AREA BCD HEUTU SEMINAR



NEBC sunga Baptist Children Department ten tukum sunga dinga Year Plan ana koih bang in, singtang lam a Naupang heutu, sinsaktute sinsakna hun poimoh tak nisim 27<sup>th</sup> September 2023 ni'n NEBC Biakin Bihidin ah neih in om hi. Hiai hun ah mi 40val bang a kipaikhom theih ziakin Toupa min ka phat hi.

Seminar hun in, naupang sinsaktute ading a poimoh taktak thupi sinsaktu Lic Pastor Subash BK, in ***Sunday School sinlai bu bangchi***

**zat phattuum ding hiam** chih sinsakna pia a, Pastor Ran Kumar, AFS in **Toupa gama dia vualzou Naupang hihna dinga Heutute mohpuakna** chih a sinsak banah, Rev Dr Thangminlun Mangte, FS in **Naupangte Tanchinhoih a San theihna ding ua Sinsakna (Teaching Methods)** chih thupi pansan in sinsakna pia hi.

Naupang heutu a tel teng lak a khat kia chihlouh, a dang teng a ding a hiai bang kisinsakna a khatveina ahihman in a poimohna muh semsem a aom banah, a telte mahmah in leng hampaha a ki sakdan uh a gen un hon kipaksak mahmah hi. Ahun bel zing dak 7:30am in kipan a nitak lam dak 5:30pm tan in kizang zou hi.

A chituam mahmah bel, ei lamah naupangte a pawlpawl a om tiltel a kisinsak i hihlai in, hiai lam ah naupang a om bangbang a lompi a hilh khom chih bang, leh a tangpi in Beginner leh Primary khong hi deuh tangpi uh a, sinsaktute bel Senior a zoh a piching ah lut a huchia Local in Sinsaktu dinga sep chih leng om ngel lou in naupang kum 17/18 khong bang leng sinsaktu a apanna khua/saptuam khong leng om hi.

Hiaihun in, Naupang Heutute mohpuakna leh a poimohna uh theihsak ahih banah, sinsak dingdan, Tangthupha piakkihiak ding dan leh, sinlaite apan naupangte Jesu Khrist muhsak ngeingei ding ahidante ngaih poimoh a kinei in kisinsak hi.

Huaiziakin, hiai seminar in gah hoihtak a hon suah a, sinsaktu hiai hun a telten a hinkhua ua hon phattuampih ngeingei na ding un thumna toh delhzui zel poimoh petmah hi.

*Ka kipak, simtute Toupan hon vualzawl chiat hen aw.*

Field BCD sik in,

**- Rev Dr Thangminlun Mangte**

*Field Superintendent, HMS*

## **NEKZONNA DOHKAN PULPIT NASEPNA GENCHETNA:**

Nekzonna Dohkan Pulpit Nasepna i saptuam [EBC] in Pathian' Mission sepna ding a Bible sinsakna pansan a kalsuanna kum 2023 a i pat ahi. *Kolosate 3:17, 23, 24, 4:5; Nasepte 18:1-4; Efesate 5:15; Mathai 10:16; 1 Pet 2:12; Jeremia 29:4-11*

I saptuam mi, khalam pianthakna nei, saptuam thununna a omlel hilou, Pathian' mission sem nuam, Pastor in Recommendation a bawl leh interview tungtawn a sehkhak a om mite (1-5) anuai abang a sai a etzui ding.

1. **Missionary Associate:** Saptuam in i seppih World Evangelization for Christ/ Serving In Mission tungtawn a missionary kuannuamte saptuam in facilitate in, pha a sakte amau lak ah recommend ding hi. Amaute' recruitment process zui in paitou ding a, lak a omlel Memorandum of Agreement nei in saptuam pen sending & supporting church in a pang ding a, vualzawlina toh nagotna nei in member/ sender care support petou ding hi. Chawmna pen hun paisate bang in saptuam in WEC/SIM toh kithuzak in, i hihtheih bang in i pang ding hi.
2. **College Student:** Lehkhasim lunglut, college kai a nekhonna neih sawm a laisim ut, hiai nekhonna tungtawn a Pathian nasem nuam panpihngaite panpihna piak ding. Nation Missions Consultation toh pangkhawm a sep ding ahi a, saptuam in NMC lam a facilitate ding hi. (NMC in Christiante college kaina a huhna poimohte etkaipihna sem hi). Lampaina a huhna leh huhna dang poimoh a omlel a poimoh dungzui a etkai ahi ding. Hiai bang College naupangte a lemtanna munte a group fellowship bawl in khalam leh NDPN vai sinsakna a kallak in a kipezel ding hi.
3. **Coaching Career:** Sepna ding gelh a, hiai tungtawn a Pathian nasem nuam, coaching class kai nuam hiam omna ding leh material/laisimna mun ding toh kisai panpihngaite panpih ding. Coaching class kai nuamte a lemchan liaileh Lamka a centre omsate tawn a chawm ding, Laisimna dia giahna leh material/ laisimna mun poimohte, Lamka ah Centre bawl a etzui ding. Exam dia khualzinna leh zintunna, Aizawl leh Guwahati tan etkaipih ding. Lohching a omlel, "Working Professionals" NDPN nasepna a kihel ding. Amaute khalam leh NDPN vai a sinsak ding a kallak a neih hizel ding hi.

- 4. Training Vocational:** Lai lam hiseselou, nasepna lam tuamtuam a sepna tungtawn Pathian nasem nuam, huai dia training leh sepna zonna lam a panpihngaite Lamka, Delhi leh Bengaluru te ah tuabang a septheihna ding ua kithuahpih ding. Lamka a training lemchangte Lamka ah training sung chawmna piak ding. Delhi/Bengaluru ah lampaina ban ah training sung chawmna piaktheih ding. Hiai munte lou poimohna omleh, athu zil a ngaihtuah ding. Alemtanna ah group fellowship bawl in, khalam leh NDPN vai a sinsak zel ding. Training zoh a sepna zonsung kha nih tan chawmna piaktheih ding. Sepna pat nung a poimohna tuam a omleh kha khat/nih behlap theih ding. A lemtan leh Delhi & Bengaluru ah PG a subsidized rate omtheihna ngaihtuah ding. Sepna mute “Working Professionals” NDPN nasepna a kihel ding.
- 5. Start-up Business:** Kisinsiamna neita, amau a nekzonna kibulpat a, hiai tungtawn a Pathian nasem nuamte a ding in Khopi saptuam omnate leh i missionaryte sepna munte ah, kibulpatna ding sum lam ah huhna leh a pung omlou a loan pia a panpih ding. Hiaite ahitheh tan in Missionaryte omna mun hileh huchilou, athu zil in Delhi leh khopi saptuam omnate ah leng. Amau siamna zil a huhna leh apung omlou loan gawmkhawm 2 lakhs tan omthei ding. A kallaklak in khalam leh NDPN vai a sinsak ding. Missionaryte toh pangkhawm in ma a la ding uhi. Loan pen nasep kipat apan kha guk apan din pan in, kum nih tan a ditsiang ding. Amaute a ding “Monitoring Team” bawl ding. “Working Professionals” a bang hita ding.
- 6. Working Professionals:** Nekzonna neisa, tua a nekzonna pen Pathian nasepna a zang nuam mite a dia seminar nei a, a poimoh bang a kithuzakna leh kalsuantouh zelna dia a thulam a kipanpih ding, chihte ngim dan ahi. Khopi saptuamte a awareness leh seminar neih a, hiai bang mi zon ding. A lunglut bikte team bawl a Networking leh training neihtouh zel ding.

## DIVISION KUMSIM KHAWMPI REPORT TOMKIM

1. Lamka North Division in Division Kumsim Khawmpi 17na EBCC Immanuel, Hqtrs. Veng ah October 7, 2023 in **KIPUMKHATNA Eph. 4:3** chih thupi pansan in zat zoh ahita. Hiai hun in Palai vaihawmna leh term thak a Division sung a department tuamtuum a committee member dingte leh kumnawn khawmpi a vaihawm ulian, leh DEC member ding telna kinei in commissioning hun leng zat ahi.
2. Lamka South Division in Division Kumsim Khawmpi 17na EBCC Zion, New Lamka ah October 7-8, 2023 a neih ahi. Hiai Khawmpi a Rev Thawndoulian Director of Ministries EBC in **HATTAK LEH HANGTAK IN Jos.1:9** chih thupi pansan in thugenna hun zang hi. Hiai hun ah Palai vaihawmna leh term thak a Division sung a department tuamtuum a committee member dingte leh kumnawn khawmpi a vaihawm ulian, leh DEC member ding telna kinei in commissioning hun leng zat ahi.
3. Vangai Division Kumsim Khawmpi 48na EBCC Buangmun ah October 7-8, 2023 sung in ki nei hi. Hiai hun in **PATHIAN LIMSAKNA 1Tim 6:6** chih thupi pansan in DS leh Area Pastor ten thugenna hun leh Devotion hunte kizang hi. Hiai khawmpi ah Palai vaihawmna leh term thak a Division level a vai paw ding Committee member thak telna leh kumnawn khawmpi a vaihawm ulian, leh DEC member ding telna kinei hi
4. Singngat Division in leng Division Kumsim Khawmpi 46na EBCC Singngat ah October 6-8, 2023 sung neih ahi. Hiai hun in Rev Paukhanmang Guite, GBC Principal in thugenna hun zang hi. Khawmpi hun in Division sung a vaipaw thak ding department tuamtuum a committee member leh kumnawn khawmpi a vaihawm ulian, leh DEC member ding telna leh na gotna leng kinei hi.
5. Thanlon Division Kumsim khawmpi 46na October 6-8, 2023 sung in EBCC Thanlon ah neih in om hi. Hiai hun in Rev Dr. S Vung Minthang EBC Genral Secretary in **PATHIAN LIMSAKNA 1Tim 6:6** chih thupi pansan in thugenna hun hong zang a nuam in manpha mahmah hi. Pastor Tualthianmung Hangzo in Bible Study hunte zang a nuam mahmah hi. Hiai Khawmpi ah Division sung a kumnawn khawmpi a vaihawm ulian, leh DEC member ding telna kinei hi. ■



# Ordain Sunna

1. Min: **UPA S. KHAMSIAM**
2. Pianni: 1950
3. Pianna Khua: Hiangtam Lamka
4. Pianthak Hun:
5. Baptisma: 1969  
Baptistu: Pastor PK Englian
6. Pa Min: PA Sunkham Sektak
7. Nu Min: Nu Chalmawi
8. Zi min: Ngaisuanching
9. Kitenni: September 5, 1979  
Kitengsak tu: Pastor Liankhoshyam
10. Gil a gah goutan neihzah: 9      Pasal: 4      Numei: 5
11. Tu melmuh zah: 0      Pasal: 0      Numei: 0
12. Tulel a omna Saptuam: EBCC Hiangtam Lamka
13. Tulel a kizatna: TBUC Member
14. Ordain Kum: December 12, 1993  
Ordain Petu: Rev T Jamkhothang
15. Pahtakna lai san kum: 2020
16. Toupa kiang a tawldam ni: Sept. 30, 2023, Vui ni: Sept. 30, 2023
17. Vuitu Pastor & Saptuam: Pastor T Songkhanthang,  
EBCC Hiangtam Lamka
18. A tanchin gelhbeh tuak sakte:  
Missions Committe a hun sawt kuamtak ana len in,  
BCD Superintendent leng kum 13 vingveng len hi. Asst  
Superintendent in kum 1 len a, Finance Secretary in kum 3  
len a, Secretary in kum 5 len hi. Naupang aw kichi tualsung  
weekly NEWS ah Editor in leng ana pang hi. Aman Solkal nna  
a sep ma in Convention Book Room ah leng sawtkuam tak ana  
sem kha hi. Solkal ah supervisor (EI) DIC, Churachandpur ah  
Febuary 28, 2014 in ana pension ta hi.



*Toupa' khasiangthou in a nutsiat a inkuan leh Saptuam te khamuan in makaih zel hen aw.* ■





# Kipahthu Genna THUMNA MAKAI

**NOVEMBER 2023**

**1 NILAINI:** November kha honpikai i biak Pathian kiang ah kipahthu gen ni. November 1-5 sung CBA Lanva in Naupang chialpi neiding a, Evan. Lianding Guite thugenpi in pangding, Pathian ompihna leh makaihna ngen in thumpih ni.

**2 NINGANI:** November 3-5 sung TBDC Vaalveng in Chialpi neiding a, Evan. T Damkhotang in Pathian thutak gending. Chialpi lohching ahinna ding in thumna ah phawk ni.

**3 SINTAWPNI:** October 30 – November 5 tan Himalayan, Dhemaaji Mission Field leh Guwahati Mission Centre veh in Director of Missions leh Missions Co-ordinator in hun zanglet uh, EBCC Elim Veng in November 4-5 sung “Kha Thilpikate” toh sai in hun zang ding ua Rev. Ginmalsawm DS/LND thugen in pang ding, lohching tak leh gahsuahtak a zoh ahiththeihna ding in thumpih ni.

**4 KIGINNI:** Tukum Pawl 10 result hohtak Toupa'n honpia a, i kipak mahmah hi. Compartment exam ah Sinzawl High School apan 6 exam te lohchingvek in, Ebenezer Academy ah 27 exam te leng lohchingvek uhi. Hiaibang a lohchinna honpia i biak Pathian kiang kipahthu gen ni.

**5 NIPINI:** Gamsung buaina nasatak kal ah Saptuam a semtute khaloh kipethei zela i om man in Pathian kiang ah kipahthu gen ni.

**6 SEPPATNI:** Rev. G Thangsanglian in Guwahati pansan a Pathian Mission semding in ana joint ta hi. Hiai mun pansan a Manipur leh Assam field thakte leh gamdang a kuankhete enkai ding ahiman in, feltak leh kizentak a honsep khiak theihna ding in thumna ah phawk ni.

**7 SEPNAWNNI:** November 8 in BCD Zion in Inter & Senior seminar neidinga, Evan. Lianding Guite in sinsak ding, kisinsakna manpha leh lohching ahinna ding in thumpih

ni. November 8, 2023 in CEC meeting om ding, Memberten Pathian khathopna toh vai a hon hawm theihna ding un thumpihni.

**8 NILAINI:** November 10-12 sung EBCC Dinthar, Aizawl in Hotdamna chialpi neidinga, Evan. Lianding Guite thugenpi in pangding. Hiai hun toh kituak mah in Evan. T Damkhotang in EBCC Tlangnuam ah hun zang ding a, Evan. N Thangsuanpau in EBCC Thuampui ah hun zang ding. Chialpi lohching ahinna ding in thumna ah phawk ni.

**9 NINGANI:** November 10-12 sung EBCC Vaalveng in Chialpi neiding a, Rev. K Kamchinkhup, DMs thugenpi in pangding. EBCC Pearsonmun in November 10-12 sung kum 15-30 tante a ding in Camp nei ding ua thugentu in Rev. Ginmalsawm DS/LND pang ding, lohching leh manphatak a neih ahiththeihna ding in thumpih ni.

**10 SINTAWPNI:** Tukum Division leh Headquarters ah Committee tuam tuam kitel kum ahihdungzui in Divisionte ah kizouta. Pathian kianga kipahthu genkawm in, Headquarters level kitelna dingte leng lamzangtak a zoh ahinna ding in thum ni.

**11 KIGINNI:** I gamsunga zu leh khamtheih chi tuam tuam honglutzel te dal leh khamzoh ahinna ding in thum ni.

**12 NIPINI:** Lametna mun ah mihing bukim kepna nasep paithazel. Gamsung buaina in hon sukhazek mahleh buaizenlou in kipaithou theizel, kipahthu gen in, semtute leh kep a ornte a ding in Pathian ompihna leh makaihna ngen in thum ni.

**13 SEPPATNI:** Olive Retreat Centre (ORC) ah Camp, Chialpi leh inkuan leh mimal banah thumpawl tuam tuam ten hun zangtheizel uh, Pathian kianga kipahthu gen in, hiai mun a semtu, Suankhanmang te sungkuan thumpih ni.

- 14 SEPNAWNNI:** November 15-19 sung CBA Central Church, Gochinkhup Veng in Chialpi neiding a, Evan. T Damkhotang in Pathian thutak gending. Chialpi lohching leh gahsuahtak a zat ahitheihna ding in thumna ah phawk ni.
- 15 NILAINI:** Tukum Khawmpilian kum 75a a chinna hita ding hi. Manpha leh gahsuahtak a zat ahitheihna ding in thumna ah phawk ni.
- 16 NINGANI:** Convention Book House nasepna gamsung buaina in naktak in sukha, himahleh tutan khawllou in paitou theizel hi. Kipathu gen in, semtute ading in Pathian ompihna leh makaihna ngen in thum ni. November 17-19 sung EBCC Sinzawl in Nungzuihna Chialpi leh Seminar nei ding uh Rev. Gimmalsawm thugenpi in pang ding Manpha leh gahsuahtak a zoh ahitheihna ding in thumpih ni.
- 17 SINTAWPNI:** Nekzonna Dohkan Pulpit Nasepna pansan a Pathian Mission i sep sawmna ah, i kalsuanna ding leh i sepna dingte ah Pathian ompihna leh vualzawlina ngen in thum ni.
- 18 KIGINNI:** Kumsim Khawmpi 75na toh kisai a vaisai dia mohpuakna tuam tuam neikhate leh Khawmpi palai gamla leh nai a hong kipandingte bangmah buaina omlou a hong tunkim theihna ding un thumna ah phawk ni.
- 19 NIPINI:** November 20-27 sung Convention English School ten Final Exam nei ding uh, buaina bangmah omlou a zoh ahihna ding in thumna ah phawk ni.
- 20 SEPPATNI:** November 20-24 sung EBCC Zehang Lamka in Hotdamna Camp neiding a, Evan. Lianding Guite in Pathian thutak gending. November 21-26 sung EBCC New Lane in Halhthakna Chialpi nei ding thugenpi in Rev Ginmawlsawm DS/LND pang ding lohching leh gahsuahtak a zoh ahihna ding in thumpih ni.
- 21 SEPNAWNNI:** November 22-26 sung EBCC Vaikhotlang in Hotdamna Chialpi neiding a, Evan. T Damkhotang thugenpi in pangding. Khasiangthou vehna leh pawlna ngen in thumpih ni.
- 22 NILAINI:** Youth Retreat Volunteers Camp, 2023 Phase 2 a khen in, batch 9 tan lohchingtak in Olive Retreat Centre ah zatoh hita. Honpitu Pathian kianga kipathu gen in, Camperte a ding in thumzomlai ni.
- 23 NINGANI:** November 25-26 sung EBCC New Kangkap in Chialpi neiding a, Rev. K Kamchinkhup, DMS in Pathian thutak gending. Thumna ah phok ni.
- 24 SINTAWPNI:** November 25-26 sung BCD Lamka Baptist Church in Naupang Chialpi neiding a Evan. Lianding Guite thugenpi in pangding. Pathian kha pawlna leh makaihna ngen in thumpih ni.
- 25 KIGINNI:** EBC Relief Sub Committee tungtawn in gamsung buaina ziak a haksatna tuakte khotuahna lam tuam tuam ah paitou zel, Pathian kianga kipathu gen in, memberte a ding in thumsak ni.
- 26 NIPINI:** Myanmar a WEC tungtawn a i semtu Miss Angela Hauzel July kha a kipan semtu taktak hiding in WEC heutu lam akipan pom in omta. Hiaitoh kiton in mohpuakna poimoh mahmah Prayer Co-ordinator leh Deputy Safeguard Officer te piakbeh in om, kipathu genkawm in, amohpuaknate hoihtak a honsep theihna ding in thumpih ni.
- 27 SEPPATNI:** November 28-29, 2023 in BCD EBCC Lungchin in "Annual Day Cum Heutu Kisinsakna" zang ding ua, Rev. M Ginminthang, Child Co-ordinator in Pathian thutak gen in sinsakna peding, thumna ah phawk ni.
- 28 SEPNAWNNI:** EBC Kumsim Khawmpi 75na a thugentu ding, Rev. Dr S Vung Minthang, GS leh Bible Study pitu ding Rev. Paukhanmang Guite a ding in Pathian ompihna leh makaihna ngen in thumpih ni.
- 29 NILAINI:** Kumsim Khawmpi 75na Ulian dingte leh Khawmpi palai nai leh gamla a hong kipan dingte dam leh bittak a hongtunkim chiatna ding un Pathian makaihna ngen in thum ni.
- 30 NINGANI:** EBC Kumsim Khawmpi 75na a intekna lading EBCC Hebron in fel leh kizentak a vai honsai theihna ding uleh khawmpi kisakkholhna lamzangtak a apai theihna ding in Pathian makaihna ngen in thum ni. ■



EVANGELICAL BAPTIST CONVENTION

## KUMSIM KHAWMPI 75NA, 2023

Thupi -

### KIPUMKCHATNA

Ephesate 4:3

**Amun:**

Gospel Centenary Hall  
Hebron Veng, New Lamka

**Ahun:**

December 07 - 10, 2023

**Thugentu**

Rev. Dr. S. Vung Minthang  
General Secretary

**Bible Study**

Rev. Paukhanng Guite  
Principal, GBC

#### KHAWMPI 75na ULIANTE

- Business Chairman** - Upa Khamhenthang Ngaichte
- Business Vice Chairman** - Upa Dr. N. Lalzagou
- Business Rec. Secretary** - Upa M. Thanglianngang
- Business Asst. Rec. Secy** - Upa SK Denga

#### DECEMBER 10, 2023 | NIPINI

##### BIBLE STUDY | 06:30 AM - 08:00 AM

- 06:30 AM** : Hun patna - DS Mizoram Division
- 06:35 AM** : Kipumpiakna - Lapite makaih in
- 07:00 AM** : Bible Study - Pitu
- 08:00 AM** : Hun khakna - FS Manipur

#### DECEMBER 10, 2023 | NIPINI

##### MIPI BIAKNA | 10:30 AM - 01:00 PM

- 10:30 AM** : Hun patna - Director of Mission
- 10:35 AM** : Phatkawmna - Lapite makaih in
- 11:00 AM** : Thilpiak latna - DS Singngat Division
- 11:05 AM** : Phatna Lapawl - i) BYF Vengnuam  
ii) BYF Kanaan
- 11:20 AM** : Thugenna - General Secretary
- 12:00 PM** : Pahtakman hawmna - Director of Ministries  
Upa Pahtakna lai - Pekhetu Chairman CEC  
Semtu Pahtakman - Pekhetu Khawmpi Chairman
- 12:30 PM** : Phatna Lapawl - i) BYF Zenhng Lamka  
ii) EBC Central Choir
- 01:00 PM** : Hun khakna & Singpi latna - Pastor G. Khankham

EBC KHAWMPI 75TH JUBILEE KIPAHNA  
SINGPI DAWNKHAWMNA

#### DECEMBER 08, 2023 | SINTAWPNI

##### PALAI VAIHAWMNA | 10:30 AM - 05:00 PM

- 10:30 AM** : Khawmpi Honna - Khawmpi Chairman
- 10:35 AM** : Kipumpiakna - Lapite makaih in
- 11:00 AM** : Vaidawmna - Chairman CEC
- 11:15 AM** : Vaihawmna - Khawmpi Uliante Makaih in
- 04:20 PM** : Thupukna simna - Recording Secretary
- 05:00 PM** : Hun khakna - Director of Ministries

#### DECEMBER 09, 2023 | KIGINNI

##### BIBLE STUDY | 06:30 AM - 08:00 AM

- 06:30 AM** : Hun patna - DS Vangai Division
- 06:35 AM** : Kipumpiakna - Lapite makaih in
- 07:00 AM** : Bible Study - Pitu
- 08:00 AM** : Hun khakna - DS Imphal Division

#### DECEMBER 09, 2023 | KIGINNI

##### PALAI VAIHAWMNA | 10:30 AM - 05:00 PM

- 10:30 AM** : Hun patna - Khawmpi Vice Chairman
- 10:35 AM** : Kipumpiakna - Lapite makaih in
- 11:00 AM** : Vaihawmna - Khawmpi Uliante Makaih in
- 04:20 PM** : Thupukna simna - Recording Secretary
- 05:00 PM** : Hun khakna & Ankuang latna - General Secretary

#### PALAI ANKUANG UMKHAWMNA

#### DECEMBER 10, 2023 | NIPINI

##### ORDINATION & BIAKNA KIKHOP | 02:00 PM - 05:00 PM

- 02:00 PM** : Hun patna - Vice Chairman CEC
- 02:05 PM** : Phatkawmna - Lapite makaih in
- 02:15 PM** : Thilpiak latna - Director Development
- 02:20 PM** : Phatna Lapawl - i) BYF Hebron  
ii) BYF Singngat
- 02:30 PM** : Thugenna - General Secretary
- 02:45 PM** : Thuchianna - Director of Ministries  
Ordainna - Officiating Minister  
Panpiltute - DS & DEC Chairman teng  
Certificate pekhetu - Khawmpi Chairman
- 04:10 PM** : Phatna Lapawl - i) BYF Pearsonmun  
ii) BYF Peniel
- 04:20 PM** : Commissioning - General Secretary
- 04:30 PM** : Phatna Lapawl - i) BYF LBC  
ii) EBC Central Choir
- 04:40 PM** : Khawmpi Report - Recording Secretary
- 04:55 PM** : Phatna la nanung - Lapite makaih in
- 05:00 PM** : Khawmpi khakna - Khawmpi Vice Chairman

#### THEIHTUAQTE:

- Palai minkhawmna: December 07, 2023, 10:30 AM - 03:00 PM sung Dorcas Hall ah a om ding. Palaite singpi & sang a vaidawn ahi ding.
- Programme a tanneite a hunma a tun a, a mailam a Ushers te'n a sehna mun us tut ding ahi.
- December 9, 2023 nitaklam Palaite' Ankuang umkhawmna a om ding. December 10, 2023 zing Biakna kikhop zoh in Khawmpi 75th chin lopna in singpi & sang mipni' dawnkhawm na a om ding.
- Khawmpi intekna la ding EBCC Hebron.

---

---

---

**BOOK POST**

Postal Regd. No. MNP 07 | Regd. No. 22344/70

If undelivered, please return to

The Editor,  
KHRISTIAN THUKIZAKNA  
P.O. Box-6, Dorcas Hall,  
New Lamka-795006, Manipur, India

TOUPA A DIA PIAK NGAMNA.  
KIPHALTAK A PIAKNA.  
KIPAKTAK A PIAKNA.